

## ***ASO TOFI, 20 IANUARI 2022***

*Na toe faaauau Taualumaga a le Fono Aoao Faitulafono i le itula e 2:00 i le aoauli.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2021/2022.*

**FOFOGA FETALAI:** E faasilasila atu ua toe amatalia nei Taualumaga o le Fono Aoao Faitulafono. E le tau ufiufia le ala mai tua o lupesee, ua to foi i tua malama o Suliata, o lea ua tau lata le ava ma le fatafata i lenei vaega o le aso mo le faaauauina o le tatou galuega. Ua faamalo le usufono, faamalo le onosi i le mamalu o le Palemene.

I le toe taliu mai ai mai le tatou malologa, e faataatiaese Taualumaga i le itula e 1:00, o lo o saunoa le Afioga i le sui Fofoga Fetalai, o le sui usufono foi mo le Aiga i le Tai.

E tapa ma le faaaloalo lau Afioga mo le faaauauina o lau sunoaga.

**Afioga AUUAPAAU MULIPOLA ALOITAFUA:** Ua faafetai mo lou avanoa lau Afioga i le Fofoga Fetalai o le Maota.

E manatu o lea ua matu le fau i le taliga o le sua. Ua maua foi le faasiligamalosia i lau Afioga i le Taitai o le Malo lau Afioga i le Tamaitai Palemia, Alii ma Tamatai Minisita o lau Kapeneta filifilia. E faapea foi le aiga Minisita Lagolago, ma le la Itu o le vai, i le Afioga i le sui Taitai o le Itu Agai, ma sui usufono mamalu uma o lenei Palemene.

E faamalulu atu foi, o le a foi se faifua ua maua iinei i le Penisula i le ma Ofisa, ua faalaulau toafa ia Tiafau nei. Ae ui i lea, e faamalulu atu i lea tulaga.

Lau Afioga i le Fofoga Fetalai, e fia faaauau se motugaafa a lenei itumalo, e tusa ai ma le le Tala Faaopoopo o le Tupe, ae o lea sa tu le lui e faamalamalama le miti ma le faalepo na saunoa i ai le sui usufono o Sagaga Nu 2. O le mea lea, e usitai i lau faatonuga lau Afioga.

A o le i faaauauina le faamatalaga o le miti, e i ai le masina e tau e toeaia pe a faapea e faaoga le masina, e tau o le masina e malupeaua. O le masina lea e pei e lafi mai, e masina faatali, e pei e lafi mai tua foi lele o le puao se i tilotilo mai agai i le paneta lenei. Ona i ai lea o le faaupuga a toeaia o le

masina e malupeaua, e iloa lava lava i lona atalua. E fiu lava e lafi e iloa lava. E faafetai i le sui usufono o Sagaga Nu 2, e fia malamalama i le miti. A o le miti la a le Aiga i le Tai, o lea ua uma ona faamalamalama le miti i le Afioga i le Minisita, leaga o lea ua faatu lau lui i le Afioga i le Minisita o Tupe. O le miti la e faapea, e eseese ai taua. Aua afai ta te savavali faatasi i le faitotoa o le afioga i le Minisita se i tatala mai lona finagalo agai i le paketi ia taua. E tagai mai la ia te oe, e ese foi le tagai mai a le Minisita i ate au. E leaga ou te savali atu loa, e lua lava me e matau mai ai au e le Minisita, o au o le lauga a le itumalo, ma o au o le pou o le toafa. Ae a ta o faatasi la, e lelei lena, ae a ta o eseese e pau lava lau galuega e fai i le Minisita, o e silafia le sui usufono o Sagaga 2, lea na lauga i le tagipalau foi lele, pa-doom-pa-doom, ma tau le miliona miliona miliona. O le eseese la, na ona ou faliu lava ma faapea atu. Lau Afioga i le Minisita, o le tagipalau lea na saunoa i ai, o le tagipalau e faatausuai ae fiaola i le miliona lea e faatosina atu. A o au la, o lau tuumusu i le Minisita, e le gata ina naunautai lou manatu, ae leai lava sau tupe o i le taga. Ui o lea, o le miti lena.

O le isi foi itu, ou te tilotilo ma ou faafetai i le Minisita o Tupe, aua o i e tafe mai ai le vai o manaoga uma lava o tatou itumalo. O i tatou te faamemelo i ai i lana faasoia aua se manuia mo tatou itumalo.

E toe foi sau tala e tusa ai o se tauanau ma sou agaga naunautai ona o ni atinae mo lou itumalo. Ia Aiga i le Tai, e pei lava ona ou fai atu, ou te le faanunuta pe ou te gauta i le taimi lenei. E pau lava o lea tuu mai lo outou faatuatuaga, tatou aea lea manu ua ulu i le faigamalo ua tulai mai. E tatou te maua penina i tifa a tia o le gataifale pe a tuufaatasi outou finagalo.

Ona ou oo mai lea e pei ona tauale vaega foi lea o moli auala, e momoli lau faafetai i le faasoia a le Minisita. E pei lava ona ou fai atu, o si ou motu lea e i Manono, a taoto mai le motu lea, o lea e faatafetafea i le va o Upolu ma Savaii, ae sulugia atoa le motu lea e moli. E i ai le gagana faatupulaga o lou itumalo, e pei o se meli foi lea e taoto mai i le loloto o le gataifale. Ae a faaletonu ona moli auala, ma street lights, e tele lava se galuega e toe fia fai i ai. Ae po o fea foi le itu o le motu e agai mai ai mala faalenatura. E ese lou alofa i si ou motu. E po o Saute, Sisifo, Sasae ma Matu, e aafia uma lava. O le tamai faalavelave lea na tulai mai nei, na aafia lava lou motu, le motu lea o Manono. E masalo e faapena foi lou motu i Apolima Tai. O le mea lea, tuu atu ia oulua afioga i Minisita, ae faamalo faafetai i lea vaega seleni ua ou matauina.

E pei ona ou fai atu ma ou tatalo atu lou itumalo, o a nisi galuega o outou faamoemoe i ai e pei o le poloketi lea, aua tou te atumatagi, e le o i inei le Minisita e fitoitonu i ai le matafaioi lea. Ae tuu maia lo outou faatuatuaga tatou te fesilafia lava i le vaevaeina o a tatou Komiti o le a galulue i lea vaega o le poloketi.

Ona aumai lea o sau tala e faaiu ai le lauga a Aiga i le Tai, e pei lava ona ou tatalo atu. Lo tatou itumalo, ia mau le toovae ma ia tatou tootuli pea i

luma o le Atua. Ia limataitaiina i tatou i lenei Faigamalo ua i ai, i ala o le Tulafono, tino o le Tulafono. E leai leai lava so tatou maluapapa nai lo le Tulafono.

E pei lava ona outou silafia e i ai lava Tulafono a le Atua tatou te limataitaina ai. E pei ona i ai le Aufaigaluega tofofi a le Atua o lo o faatunapaulia i lo tatou itumalo ma Samoa, e faapena foi se alafua o lea ou te fautuaina ai lo tatou itumalo.

E taelua se faamatalaga ona ua agiga foi i lenei Maota ia ala o fesootaiga i lenei vaitau. O lau fautuaga, e leai e le aafia matagi i liuovaa. Lo tatou itumalo ma tama fanau a lo tatou itumalo, ma ona fanau aaoaina, aua le avea le malosi o le tekonolosi ma auala faaneionapo e felautoai ai. O le fautuaga faa-au o le auauna a lo tatou itumalo, ia o tatou faaaoga tataua ia ia avanoa ua tuu mai, mo le faalauteleina o le malamalama ma le iloa. Ae a tatou lilifa loa i se isi itu, saafi fili mamate a lou tagata ma lo outou sui usufono, o fanau a Aiga i le Tai e ao i ai amio a Samoa. E na ona ou faapena atu. Ua outou tagatagai i luga o upega tafailagi, ou te le faaaogaina i se auala e le talafeagai. O le sootaga lea o au nei ma lo tatou itumalo, e avatu ai se fautuaga ma ni itu e fia faailoa atu lo tatou itumalo. Ua ou faaleo lea lagona, ona ua pei o se vi toli tulou le Maota, i le tele o aafiaga ua tulai mai i lenei vaitaimi, ona o le faaaoga sese o upega tafailagi.

Ona ou faapea atu ai lea, le mamalu o lenei Palemene, aemaise le Tala Faatatau Faaopoopo o le Tupe lau Afioga i le Minisita ma le aiga Kapeneta, e matua lagolagoina lava e le Aiga i le Tai le Tala Faatatau o le Tupe.

Ia alofagia e le Atua le itumalo, aemaise o le Aufaigaluega tofofi i so o se Peteli o lo o outou faanonomanu ai, ina ia maua e lo tatou itumalo le saogalemu ma ia o tatou tumau pea i le Atua.

Alofagia lenei Palemene le Tamaitai Palemia ma le galuega ua tau amata o lenei 5 tausaga, tatou te le ma iloa po o fea o i ai faafatiatamai.

Ia mamao le lagi i tupaau o le itumalo, maua le lauga ia te oe Aiga i le Tai. Ia aoga le ea o ou motu e 3 o lou itumalo, maua se faasiligamalosi i le Aufaigaluega tofofi a le Atua.

O le itulau a Tina ma Tamaitai, ia alofagia e le Atua la outou fautuapule.

O outou le fanau aoga, ia tupu mai i lo tatou itumalo i Samoa atamamai. Aua e le natia o lo tatou itumalo, tele faiaoga, tele loia, tele tausisi ma isi vaega faapena o le itumalo, tele faamasino e maua ai.

Ia alofagia lau Afioga i le Fofoga Fetalai, faamalo i le ta galuega. Ia alofagia e le Atua foai le malosi i le tino aemaise o le agaga e faatomatauina ai ma tauavameaina lenei Palemene.

Ia manuia sui usufono o le Palemene ua aofia. Ia manuia Ofisa Sili o Pulega o Matagaluega. O outou o lo o palasi i ai le mamafa aua le faasoasoaina o le tamaoaiga o Samoa. Ae ou ola i le manuia mai le Alii. Soifua.

**FOFOGA FETALAI:** Ua faamalo saunoa i lau Afioga i le sui usufono mamalu mai le Aiga i le Tai, lau Afioga i le sui Fofoga Fetalai. Ia malo foi le tofa, malo foi le silasila aua foi le agai i luma o le itumalo o Aiga i le Tai, ma tulaga e ono maua ai foi le fesoasoani. O le mea lea, ia faamalo faafetai mo lou sao foi i le tauavameaina o le tatou Tala Faaopoopo o le Tupe, aua le agai i luma o le tatou galuega. O le mea lea malo saunoa.

O le avanoa lenei mo se tasi o sui usufono o fia saunoa. O lea ua matau atu ua tulai mai se tasi o sui matua o le Maota, Hon Tuuu Anasii. O le avanoa lea o le sui mamalu mai Siumu.

**Tofa Hon TUUU ANASII LEOTA (Siumu):** E faafetai i lau Afioga i le Fofoga Fetalai i le avanoa foi ua maua e lenei foi usugafono. Ou te manatu, ua maea paelago ma ua taoto i lagotonu paia ma mamalu o Samoa i ona tulaga faalupelupeina. I saunoaga a lau Afioga i le Fofoga Fetalai, aemaise foi o saunoaga a sui mamalu ua maea ona sausaunoa i le taeao nei ma o le a le toe oo i ai se faamatalaga.

O paia o le Maota, afio lau Afioga i le Fofoga Fetalai. O le Failautusi ma le mamalu o le Ofisa o le Fono Aoa Faatulafono a Samoa. Afio foi lau Afioga i le Sao Faapito, lau afioga i le Tamaitai Palemia, le Sui Palemia aemaise foi o le mamalu o le aiga Kapeneta ae tainane foi Minisita Lagolago.

Ae ou te faatalofa atu foi i le sui Taitai ma le mamalu o sui usufono o lenei Itu Faaupufai e Puipua Aiatatau a Tagata po o le Itu o lo o Agaia le Malo. Aemaise o le paia maualuga o le Palemene ua potopoto.

Ou te fia faatalofa atu foi i le paia maualuga o le afaigaluega a le Malo i tupu ma ee, Ofisa Sili o Pulega o Matagaluega, aemaise foi o Faalapotopotoga Tumaoti a lo tatou Malo ua tatou mafuta faatasi i lenei taeao.

Ona ou oo atu lea i le tapuaiga a si ou itumalo. I le paia ia Sa Asomua ma Aiga e lua, lau fetalaiga Tuuu ma lo outou Aiga Sa Tuuu, le Falelua o Tulafale, Fofoga o le Alataua, Utaileuo ma le mamalu i le Faletolu.

Ae a le tapuaiga a le Aiga Sa Levi o lo o faanonomanu aua se manuia a lo tatou itumalo. Ua faafetai tatalo, malo le tapuai. E manuia lava le alofaiva o la outou auauna ona o la outou talosaga.

O le a ou sagai ane e fai sina faamatalaga puupuu lava e tusa ai foi o le Tala Faaopoopo o Tupe o lo o faapena ona lauliliuina nei e le Palemene. E momoli atu le faamalo i lau Afioga i le Minisita o Tupe, aemaise foi o le Ofisa Sili o Pulega o le Matagaluega o Tupe ma le Ofisa o Tupe, ma i latou uma lava sa galulue e faataoto mai lenei Tala Faatatau Faaopoopo o le Tupe o le 2021/2022. Aemaise foi o le Komiti o Tupe Maua ma Tupe Totogi, o le Komiti a le Palemene.

Lau Afioga i le Fofoga Fetalai, ua taliaina ma le fiafia e lenei sui usufono le Tala o le Tupe e pei ona taoto nei i le Laulau a le Palemene.

Lau Afioga i le Fofoga Fetalai, e tele ma anoanoai mataupu anoa sa fia tautala i ai, ae peitai o lea ua maea ona laga ma ua sausaunoa i ai le toatele o sui usufono mamalu o lenei Palemene, ma e le toe oo i ai se faamatalaga. Ae seivagana nai mataupu ia e laiti ou te fia tautala pea i ai.

Ou te muamua i le Minisita o le Soifua Maloloina. E momoli atu le faamalo ma le faafetai i lau afioga, le Pulega, o alii ma tamaitai fomai, aemaise o i latou uma o lo o galulue i le laina lea e tau o le pito i luma, o lea e tau o le front liners. E faamalo le galulue punouai ma le le faalogologotiga. E leai lava nisi upu e na o le faafetai lava ma le faamalo. Ua faafetai le loto atunuu, faamalo le alofa ia Samoa. E faafetai i le tatou Komiti o Faalavelave Faafuasei po o le NEOC. Ua faamalo le galulue, ae o le tatalo atu ia faaauau pea la outou galuega lelei aua e sili lava le puipuia nai lo le tau togafitia.

Ou te matua ioe ma ou matuai lagolagoina finagalo faaalua o nisi o sui usufono ua maea ona saunoa. Ia faautagia mai e le Faigamalo se tuualalo, ia faatelelegese le tatalaina o tatou tuaoi. E moni e taua le faaleleia o le tatou tamaoiga, ae manatu e sili atu le taua o le soifua ma le ola o tatou tagata. Ia tatou galulue malosi ina ia aua, aua, aua lava, ne i saofaga mai lenei faamai oti, po o le Koviti-19 i totonu o si o tatou atunuu.

Ia tatou vaavaai ia Fiti, masalo ua latalata i le 1,000 i latou ua maliliu i lenei lava faamai. Ae o la lava e naunau le Faigamalo a Fiti e tatala o latou tuaoi ma faatosina atu le toatele o tagata asiati atu. Ae i ai lava le talitonuga tatou te le fia oo i lea tulaga. A faatusatusa i le aofaiga o tagata e 1,000 ua maumau ai le soifua ma le ola.

Se i tatou toe tepa i tua i le misela, e 85, o le matua tele lava o lea fuainumera. O le tatalo, ia talosia ia aua lava ne i sao mai lenei faamai. Ia tatou vaavaai i Europa ma Amerika ma atunuu la, o le toatele ia o i latou e tetee i fuafuaga a le Malo e taumafai e tineia lenei faamai. Ae ua na o le atili ai ona faigata ona taofiofia lenei faamai aemaise o i latou nei e mumusu e fai tui, ae tasi lea vaega lau Afioga i le Minisita, se i tagatagai ane ia i latou nei e faatautee mai. Aua e manatu po o ai lava i tatou o lo o lagolago le fai o tui, ae i ai lava i latou ia o le a le faia ni tui e faau mai ai lenei faamai. E tataua ona saili se vaifofo i tulaga ia a o lei saofaga mai lenei faamai i lo tatou atunuu.

Ona ou oo mai lea i si vaega laititi lea le Minisita o le Soifua Maloloina, se i vaai ane lava i le vaega lea ua taua o le Emergency, le vaega lea e taunuu i ai gasegase ma i latou ua manunua i faalavelave faafuasei. A sulu atu se gasegase i le vaega lea, o lona uiga ua manaomia le vave ma faanatinati o se fesoasoano. O le tulaga tiga o loo aafia ai latou ua sulufai atu. Na ou i ai i le isi vaveao, sa ou sii mai atu foi, ae sai loa le isi tina i le vaega lea ma ua faapea ua fiu e nonofo, e leai lava se ano mai o le alii fomai, ma tamaitai tausisoifua sa i ai i lea itula. E le meleina le galuega fita ma le galuega faigata o lo o faafeagai ma alii ma tamaitai fomai. Ae na o se tuualalo lava, o le agaga maualalo se i silasila ane lava lau afioga i le mamalu o le atunuu. E

faapena ona saili atu se tali mo o latou tiga, ina ne i tuai le o atu o alii ma tamaitai fomai e tau togafiti ae ua faigata le tulaga ua oo i ai le gasegase.

Ona ou toe manatua lea o le falemai o le MEDCEN i Vailima, e fai lava si taugata i lea foi vaitaimi. Sa ou agai lea i ai ina ia ou alofia ai nisi o vaega ia. Ou te oo atu i le falemai lea, ua tutu mai tamaitai fomai ua aumai lou moega, fua lou toto, fua lou suka, fua lou fiva, faataoto lelei oe, ae saili mai le fomai. E po o le i ai foi o se alii fomai po o le leai, e logo mai lava e tamaitai fomai, ae o lea ua talanoa mai le fomai o le mea lea o lea o le a fai ia te oe toetiti lava taunuu mai le alii fomai. O le manaia ia, e po o le a lava le mea e oo i ai le mai, ae e vaai atu o lo o i ai le agaga e fia fesoasoani.

O se vaivaiga lea lau Afioga i le Minisita o le Soifua Maloloina, e faataoto atu pea i lau silasila. Ia alofagia le mamalu foi o le atunuu e sulufai atu.

O lea o le a ou oo i manaoga o lou itumalo. Le Afioga i le Minisita o Galuega Tetele a le Malo, faafetai o lea ua maua foi i saunoaga a nisi o sui usufono, e le aafia aualagalua i le faasoa lea ua fuafuaina e le tatou Malo. Ma o lea la, o le a ou taumafai atu pea, logo atu pea ma tatalo atu pea, faamanatu atu pea i lau afioga manaoga o si ou itumalo lea sa ou lagaina i lau lauga faataupou.

O le aualagalua lea i lou nuu o Saaga, e le i faia lava se auala i lea vaega o lou itumalo. Lona lua o le ford lea e i tafatafa o le matou aoga Tulagalua lea sa fausia e Saina i le agai lea i Sasae, ma ou te manatu o lo o molimau ia sui usufono mai Falealili e taofia foi femalagaaiga i Sasae, pe a tetele timuga ona afaina loa lea o le auala lea.

Lona tolu, o le matou auala lea agai i le aai, o lo o ui tonu atu lava i luma i le Kolisi i Palalaua, ua tele le faaletonu. Ae ou te tuitui pea, ou te talitonu e tele ma anoanoai talosaga a sui usufono ua tuuina atu i lau Afioga, ae faataatia atu pea i lau afioga i le agaga mauualalo ma lou agaga faaaloalo tele i lau afioga.

E i ai le mataupu lea ou te manatu e faaauuala atu pea, atonu e maua ai se fesoasoani i le LTA. E tatau lava ona ou tuuina atu faafautuaga po o se tuualalo i Pulega Konekarate po o Kamupani ia e pulea loli tetele e lau ai masini ma loli e lau ai uta mamafa. Se i fautua ane i afioga i ave loli, i avetaavale, faaoga le faautautaga tatau. A silasila atu ua poloka le auala, o lea ou te talanoa atu i le auala lea e agai i Vailima, Tiavi, agai atu lea i tua i le matou itumalo. E faatafa laititi lava mo sina taimi se i faagasolo ia faigamalaga a le mamalu o le atunuu. E i ai nisi e i ai ni mataupu taua o lo o tau tulituli ai le taimi. E pei o le talosaga lea ma le fautuaga ma le tuualalo e tuuina atu i le mamalu o i latou o lo o pulea nei Kamupani. Aua e faapena foi i loli lauolua, o kiliva. E i ai foi i latou o lo o faapena ona pei e taaalo i ai i le polokaina o auala. E pei lava o lou faamatalaina o le cross island road e agai atu i tua, atonu o se taimi ona faaauau lea o le galuega lea e faalautele le auala lea e agai i tua. Aua e aoga i le atunuu atoa lenei auala, ma lelei ai foi femalagaaiga aemaise o le taofia ai o faalavelave e tutupu i taavale.

Lau Afioga i le Fofoga Fetalai, e ui lava o lea ua uma ona saunoa le Minisita o Faatoaga i le tulaga lea i le miliona. Ou te fia tautala pea i ai. Sa ou tau popole i le po anapo ina ua saunoa le Minisita, e faapea ua teena e sui usufono uma o lenei Itu lenei faamoemoe. O lea e faafogafoga mai lou itumalo, e leai lava se leo o lenei usugafono i lea tulaga. Ma ou te tautino atu, na vave ona fai le fonu a lo matou itumalo ina ua tautau lenei faamoemoe. Na matou o atu i le Matagaluega o Tina ma Tamaitai aumai le tali, o matou o le itumalo muamua lea ua faatoai atu. Ae faamalie atu, e le i maua mai se faaaliga i le Minisita po o le Kapeneta i le faagasologa e uiga i lenei faamoemoe. Na matou toe foi ae taatia ai le lisi o la matou Komiti. E tasi le vaiaso ou toe fesootai mai i le Ministia, a o lana faaaliga o la ua tapena lana pepa i le Kapeneta mo lenei lava polokalame. O lana saunoaga, e toe logo mai pe a mautu se tonu. O lea lava la e faatali ae faafetai o lea ua maua mai le tala o le a toe taliu mai i fanua le faigamalaga a le Minisita, ia ma le talitonu o le a vave ai ona faaauau ia feutagaiga i lenei faamoemoe.

Lau afioga i le Fofoga Fetalai e tuuina atu pea faafautuaga i le mamalu o le Faigamalo. Faamolemole e faafaigofie ia le process mo le faatinoga o lenei seleni. Ia talia le filifiliga a itumalo i sui o komiti. O lea e aumai ia le tuutuuga e 7 tamaitai, 7 alii. Afai e le atoa ia manaoga o i latou e manaomia, e tatalo atu faamolemole e faaoga pea le finagalo o matou itumalo na filifilia mai ia sui e pei ona i ai i totonu o komiti ma lou faaaloalo.

Lau afioga i le Fofoga Fetalai o le upu lea poloketi, e pei lava e tau talia gata e le atunuu. E manatua foi e i ai ia fesoasoani mai i nisi o a tatou paaga mai i atunuu i fafo, o le tele ia o gaogaosa o mea e manaomia i taimi e tuuina atu ai ia talosaga a le atunuu. Ia o le natura lava o tatou o le fiu gofie. E tele lava ina toe faafoi nei seleni ona ua le faamalieina manaoga ma tuutuuga na manaomia mo nei faamoemoe.

O le tuualalo la i lau afioga i le Palemia ma le tatou Malo faamolemole ia outou faafaigofie tuutuuga mo le tatou \$200,000 muamua lea o le a tuuina mai mo itumalo taitasi. O lou itumalo e 4 nuu, o le mau lea e aumai, Tuuu faamolemole e talosaga e vaevae ia le \$200,000 lea i le 4 o tatou nuu, ona maua lea o le tai \$50,000 e tuu mai i o tatou nuu e faasoa e tatou le mea e talafeagai, aua i le manatu o le atunuu o le folafolaga lea na avatu, ia tofutofusia lautele o le atunuu i le tatou faasoa lea. Ia aua i le matau atu foi lea i le tatou \$200,000 muamua lea, e alu ai totogi o alauni o le komiti, alu ai ma totogi o latou ia e faapea o ofisa, totogi ai ma le lisi o le mea e tu ai le ofisa, ia ma le faatotogaina o le ofisa.

E na o nai manatu e tau ina silasila ane i ai ia faafaigofie pea ia le tatou faasoa e pei ona ua faataoto mai ai le finagalo o le Afioga i le Palemia ma le faigamalo ia ae e leai so matou leo e pule lava ia Sitafune i le la o lona vaa.

Lau afioga i le Fofoga Fetalai masalo ua maea ai ni manatu o lenei itumalo. E momoli atu le faafetai ma le faamalo i lau afioga mo le avanoa, faamalo le faatoatoa. E le faigofie foi le galuega o lo o faafeagai ma lau afioga i le

faafoefoeina o le Palemene o Samoa. Alofagia foi e le Atua le afioga i le Palemia aemaise foi le afioga i le Sui Palemia ma le mamalu o le Kapeneta, ia maua pea le tou tofamamao ma le faautautaga poto aua le tautuaina o Samoa ia o tatou agai i luma. Ia maua pea e Samoa atoa le manuia. Ia faapena foi i afioga i Minisita Lagolago ia faapena ona alofagia e le Atua la outou galuega.

Ia liliu mai foi i lea itu o le malu, ia alofagia foi e le Atua le siiga gasegase a le Taitai o le Itu Agai, ia taulu taulu sona finagalo ia toe faafoi lona soifua laulelei, ia viia pea le Atua. Ia alofagia foi le afioga i le Sui Taitai ma le mamalu foi o lenei vaega, ia maua pea e tatou le onosai ia ma le galulue faatasi, ae ia faia pea le amiotonu ua taua o le agai. Ia outou onosai foi i nisi foi o taimi e tatou te le tutufaatasi ai foi ni manatu e faaalua, ia e faamalulu atu o lea lava e faapena ona o tatou i ai i lenei vaitau ia o faiga faapolokiki.

Ia agalelei foi le Atua i le aufaigaluega a le Malo i Ofisa Sili o Matagaluega aemaise foi le lavalao o le tatou Malo i ona vaega eseese, ia faapena ona maua pea ia le toafimalie, e galulue malolosi e tautua Samoa ia aua le manuia o lo tatou atunuu.

Ia alofagia e le Atua le tapuaiga a Samoa, ia aemaise foi ia le tapuaiga a si ou itumalo, paia ia Sa Asomua ma Aiga, fetalaiiga Tuuu ma Aiga Sa Tuuu, Falelua o Tulafale, Fofoga o Alataua le Taiuu ma le mamalu o le Faletolu, le tou faafogafoga mai lau komiti, ia onosai mai masalo o le vaiaso fou o le a ou oo atu ai e faasaini ai a tatou pepa, ia ona maua lea o le tatou alauni i se taimi vave.

Manuia ia le tatou Fono.

**FOFOGA FETALAI:** Ia ua faamalo saunoa lau afioga i le sui usufono mamalu o Siumu. Ia malo foi le tofa faatoeaina, ia o oe foi o se tasi o sui matua o le Maota ia, faafetai o lea ua e faasoa faatoeaina mai foi ia aua le tatou agai i luma o le tatou atunuu ia aemaise o lou itumalo, ia malo faafetai. O lea foi e faafogafoga atu le Palemia ma le mamalu o le Kapeneta, ia atonu o le a maua ai se fesoasoani mo lou itumalo aemaise foi o le tatou poloketi e pei ona fuafuaina. Ia, ia lavapapale pea ma lava onosai, o lea ua saunoa manino le Malo, ia e taunuu lava mea uma. Ia ae tatou talosia ia le agai atu i luma ae e le i oo ia Iuni e uma ai foi le Tala o le Tupe, ia tatou faagasolo ai ia tatou fuafuaga.

Ia o le avanoa lenei mo se sui usufono mamalu e fia sausaunoa. Ia e matau atu o lea ua tulai mai le sui usufono mamalu mai ia Alofi Aana Nu.3 le afioga i le Minisita Lagolago ia Agaseata Valelio Tanuvasa, ia o lou avanoa lenei.

**Afioga AGASEATA VALELIO TANUVASA PETO (Alofi Aana 3):**  
Ou te tulai i le ava ma le faaaloalo, e talisapaia ai le faaaloalo maualuga ua



saunoa i ai lau afioga i le Fofoga o le Fono. E tau ia ina o matou faatalofa atu i tulaga aloaia i lau afioga i le Fofoga Fetalai.

Ae ua manatua i lou loto le mavaega a Tufu le Mataafa i lana fanau teine o Seuea ma Fautausala. Omai ia ina o, omai ia ina o e seu ata. Ae ia aua lava ne i oulua seu i ata uli, aua e tua i le toto ma le malolo. Ae ia oulua seu i le ata sina, aua o le ata e manaia. O le ata e agi atu le lai tau i le matagi foi mai ta feiloai.

Manatu e faapena le aso lenei, aua o lea ua lelepa sa, o sui usufono filifilia o le Maota. Ae sa o tatou tafili fausa ma faapuni le alasii e pei o tala i faiva o matuauu ma le ausepapa. Ua faalelea la lea galuega sa tautiga ai i le uluai tausaga o lenei nofoaiga. Ae o lea ua toe laga le sa o tautai, e sauni le vasa.

Viia le Atua ua maua le soifua o lau afioga i le Fofoga Fetalai, lau afioga i le Palemia, vasega o le Kapeneta. O sui usufono mamalu filifilia uma o le Maota. Manatu foi o sa ma faiga aua le usoga, taalolo. O lea ua uma ona apaapa i ai tootoo o lenei aso e pei ona tamua.

Ae faasino tonu lau o le fo i se lagona o le sui usufono o Aana Alofi Nu.3 aua le paia o le afio o Sooaemalelagi ma Alo o Tamaalelagi, Alaalatai oe le Matuanatogi ia te oe Alipia, mamalu ia te oe le Toaiva, o oe lava o le Tumua faavae. Ao le tofa aua le Susuga ia Tanuvasa, o le Laau na fausia, o le tamaloa na itulua ai le itumalo, ae na toe faufausia ai le itumalo. O upu ia te le Faleaana, ae a oe Tauti ma Malaitai ma le Faleaana i Gagae. O lo outou leo, o lo outou Tofa, o le moe, o lea o le a taumafai ai lo outou sui usufono.

E usitai le loto, ae tala faalologo i le mea ua tofa i ai lau afioga i le Fofoga Fetalai. Ia ona taumulimuli lea o se lagona, aua o le Tala Faaopoopo Faatatau Nu.1. o le Tupe 2021/2022, e fua la lau talanoa i le 8 Matagaluega e pei ona tofa i ai le afioga i le tamaitai Minisita o Tupe lana faasoa e faaauau ai galuega tau amata a lenei Nofoaiga mai i le tausaga ua tuanai.

Ae e le i oo foi se lagona e pei ona taumulimuli atu, ae avea foi lenei itula e momoli atu ai le agaga o le faafetai tele, aiga o si ou tama ma aiga o si ou tina ma aiga o lou toalua, i lo outou tauau na lalafo mai, aua se faifua e tali ai le itumalo e pei ona i ai lena masina.

A o se lagona faavauvau ma le nutimomoia ona ua toesea se tasi o poututoa o si ou aiga ma le nuu ma le afioaga, le Susuga ia Tanuvasa Soosemea Scanlan. Sa fai oe ma too sa tua i ai le vaivai a ua valaau le Atua, ua to ai le timu, aua le aiga Sa Tanuvasa. A ua gau foi le saa, i le aiga Sa Tuala, ae a le Faleaana. Tau ia ina faamaise le Atua i le faletua ma le nofoaalo ma le aiga, tafimala le faigamalaga o lo tatou tama.

Ia ona oo mai lea o se faamatalaga e tusa ai ma le Tala Faaopoopo o le Tupe Nu.1. O le agaga o le faafetai i lau afioga i le Minisita o Faatoaga, ona ua e taliaina le tuualalo ma le fautuaga, e pei ona i ai se lagona ma se vaivaiga na talatalanoa atu ai i lau lauga faataupou. Ua e silasila i le faigofie, ua e silasila i le taugofie, mai i le faaaliga a faatoaga i lona aoatetele, a o lea ua faataunuaina faaitumalo. Malo le tofa, malo le silasila, ae auala atu ai se

talosaga ma se tuualalo e pei lava ona sausaunoa nisi sui usufono o le tatou Maota nei, o le faaoo atu lea o ni aoaoga, e faapena se lagona ma se tatalo.

O lea ua o tatou sagai nei o le a faatino le faamoemoe ua tofa i ai le Malo aua le atinaeina o itumalo taitasi. A o le tatalo o le faaauppegaina ma le tapenaina o nei vaega uma, o le lava tapena o ni aoaoga aua ni tomai ma ni agavaa e faatino ai faatoaga, e faatino ai faigafaiva, e faatino ai ni atinae, o le tatalo lea.

Lau afioga i le Minisita o Galuega e tauala atu i le Fofoga Fetalai, faafetai tele i le tofa i lau afioga. O le mea sili ma taua, ua e silasila i le pagatia le fia sefulu o tausaga ua tuanai, tagi mai pea, tagi mai pea ua fia taumamafa i se vai malu. A lea ua e tali, le nuu o Leulumoega, Leulumoega Uta, faafetai tele i lau afioga i le Minisita a lea ua e tali. O lea ua taumamafa le fia sefulu o aiga ia. Ae faafetai foi o lea ua inu atu ai ma le itumalo lea o Faleaseela ma Lefaga. Faafetai i lau silasila ua le faapito Manu ia Tasi, a o le tatalo faaauau tau ia vaoto, ina ia faapena ona agai mai pea i lalo o le aena, o i ina o lo o fesootai ai ma le isi alavai aua nai aiga foi o lea faaitu.

O Nofolii, o lea ua faatino lou agalelei ia Leulumoega. E na o nai aiga foi lea ua e silasila foi i ai, ua manaomia foi le suavai. Ae ou te fai atu foi e faigofie aua e latalata atu i Fasitoo uta, o lea e aga atu ai le paipa lea. Ia e na ona faafesootai lava ia ona faapena lea ona maua ia le vaitaumafa, o nai aiga i Nofolii uta.

E le tagisa, e pau o lea, e fua le talanoa i le tupe ua faaagaga ma faaopoopo aua lau faatofalaiga. Talofa i si Aoga Faataitai i Nofolii, o lo o i ai lava sina auala lena ua faafaigata ona uia e fanau. Ia ma oo ina mamafa timuga, ia ona faigata lea ona sopoia fanau. Ia na ona tuu atu lava i ina i fuafuaga tataua a lau afioga, aua e maualuga pea le taofi o le e tuitui pea, e le pine o le a tatala mai.

Na oo lea i le aoatetele o le tatou Tala Faaopoopo o Tupe e pei ona i ai lenei aso, o lo o i ai le toa, o lo o i ai le fita, o lo o i ai le faigata i le lua sa seelua i le afioga i le Minisita o Leoleo ma le Minisita o Faamasinoga. Ou te le iloa po o a ni faiga faavae ae na ona tuu atu pea i oulua tafatafa. Ua faamaonia le solitulafono, ae ua maea ona faatino le faasalaga ae peitai, e tiga lava le 10, 20 tausaga tuanai ua maea ona faatino le faasalaga, ae o lo o mau pea i faamaumauga a le Matagaluega o Leoleo. Tulai mai le faalavelave ua tataua ona malaga i fafo, o tatou o matai, o le aganuu lea ma le faa-Samoa. Ae paga lea, ua saisaitia ona o lo o mau pea ia ia solitulafono.

Ae tatalo pe o le a se faiga, e faafesootai ai le mataupu i le Matagaluega o Leoleo ma le Matagaluega o Faamasinoga, ina ia faapena ona i ai se fesoasoani i vaega ia.

O le aso lau afioga i le Minisita o le Siosiomaga, e tauala atu i lau afioga i le Fofoga Fetalai, e taunuu mai ai le tusi mai i le Matagaluega, talitalia le oo atu o le asiasiga a lau Matagaluega i le talosaga e pei ona faaoo atu, e pei foi ona laugaina i le la tausaga, taligalu o si ou nuu, i le pitonuu lea o Vaialua ia

ma Nofolalii. Faafetai le tali, o ataata ia o tauleleia ua ou manatu ua lalata se taimi, o le a tali mai ai lau afioga faafetai.

E i ai nai faafitauli o tatou patupatu o tatou auala, e pei lava e i ai le faitau lea e manu i luga toe tofu i lalo, a ua manumanu i nai taavale. Ae a ta tilotilo i patupatu a atunuu i fafo, e pei lava e tau i ai sina mafola te isi ina ia taoto ai ia pau ia e lua ae tofu loa, ou te lagona o le a faigofie lea mo nai auala, ona ua mafatia tele le patupatu ona ua lalata tele le ae, ia ma le tofu i lalo vaeane le Maota.

Na ou faalogo anapo ma le totoa i saunoaga a ni isi sui usufono o atugalua i taifau taalua, ua afaina ai ma satia ai nai o tatou turisi mai i fafo, ae e i ai foi le talitonuga o lo o satia ai foi ia nai o tatou turisi Samoa. A o le mafauauga ma le lagona, aua foi o lea ua saunoa e na o le lua ia tatou taifau K9 pe tasi ea? Ae afai o lelei ia taifau mo le aoaoina lelei, e le o se vaifofo lea mo taifau taalua? Talitalia ia le tatou scanner, ae a galulue vaavaalua ia le scanner ma tatou taifau ia, ou te talitonu o se auala faigofie lea o le Matagaluega o lo o feagai ma lea vaega.

O lea foi ua saunoa ni isi sui usufono, faapea o lea ua tataua ona sue tatou po o tagofia... e faigofie foi galuega a taifau nei galuega a le Matagaluega pe afai e tele ni taifau faapea ua aoaoina lelei ua faigofie foi ona saili, e o lo o savali ane, savali ane, o faigofie galuega ona o le malolosi o sosogi o taifau nei, pe afai e aoaoina lelei.

E pei lava ona ou fai atu e le tagisa, ae o lea ua taoto atu manaoga ma le faatauana o lo matou nei itumalo, e taua atu i la matou talosaga tusitusia, i matou lauga e pei ona matou lauga ai faataupou i le tausaga ua tuana'i.

Ua uma se manatu o le itumalo o Aana Nu.3, e pau lava o lea, ia maua pea le tofa i lau afioga i le Fofoga Fetalai, faafoefoe, faatonufofua ai le Maota nei, lava le taimi o siisii, ae ou te talitonu ua tapenaina oe e le Atua aua le faatautaiga o le Maota o Samoa, maua le tofa i lau afioga i le Palemia, lau afioga i le Sui Palemia, aemaise ia le nofo a Kapeneta, aua le foemua ma le foemuli o le sa o Samoa i lana folauga.

Manuia lena itu, Susuga i le Taitai ma le Sui Taitai, paia maua o lena itu, a ia maua e tatou ia le nofo fealofani ia tatou galulue faatasi. Manuia le Fonousu a Samoa.

**FOFOGA FETALAI:** Ia, faamalo saunoa lau afioga i le sui usufono mamalu mai Alofi Aana Nu.3. Ia ou te iloa lea ua folasia manino lou finagalo aua foi e le gata foi o le itumalo, ia ae o le atunuu foi i lau faasoa. Ia o lea lava ua faafofoga ma le totoa le paia o le Maota ia aemaise foi ia le afioga i le Palemia ia ma le mamalu o le Kapeneta. Ia malo le saunoa, ia malo foi le lagolago aua le agai i luma o le tatou Tala Faatatau Faaopoopo o le Tupe, ia o lea ua maua lou finagalo, ia malo lauga.

Ia o le avanoa lena mo se sui usufono, o le tatou galuega. Ia lea ua matau atu o lea ua sauni mai ia le sui usufono mamalu mai i Anoamaa Nu.1 lau

afioga Alaiasa Moefaaouou, ia ou te talitonu o le avanoa lea o le tatou itumalo ma le agaga faaaloalo.

**Afioga ALAIASA MOEFAAUOUO MALAGAITUTOGIAI SEPULONA MOANANU (Anoamaa Nu.1):** Ia tasi ia ae foi le saunoaga a lau afioga i le Fofoga Fetalai. Ia ua ou manatu foi i lenei vaega o le aso. Tulai lava ma le faaaloalo, se i fai foi sina sao o lenei itumalo, ia aua ia le tatou Tala Faaopoopo o le Tupe ua i lumamea.

Ia lagona foi le agaga fialia i lenei aso i Taulumaga o le tatou Fono, faafetai i lau afioga le faatoatoa ma le faafoefoeina filemu o le tatou Fonotaga. Logosaia foi e lau afioga ia ni vaivaiga o sui usufono mamalu o le tatou Maota. Ia ae talitonu foi o lenei taeao, ia ua malie lava i saunoaga a sui usufono ua faafagogo tagiao i lau afioga ma le paia o Samoa o faafogafoga mai, ua faapai i paia ma sa ma mamalu o le atunuu. Ia ae talitonu lava ua totogo ae faafuga o laau manogi lenei taeao ma totogo ifo o malama.

Ua pai mai foi sau o le ola i le tino i le faalogo atu i le agalofa ma le agalelei o le Atua. O lele foi ua tititonoa le malaefono aua ua atoa tootoo, ua lauama tootoo foi le Fonousu a Samoa, e pei o le upu e fai i le fonu i folasa ma le fitiuta. Ia ua faitau foi ia le galumua o le tatou folauga i lenei tausaga, aua o lea ua sii i tai lo tatou sa. O lea ua faataumuaava le faamoemoe o le tatou Malo, ia aemaise o le Palemene i lenei tausaga 2022.

Ia avea foi lenei avanoa e momoli ai faamanuiaga o le tausaga fou i le paia o le tatou atunuu ia aemaise foi le paia maualuga o lenei Maota. Ia e tatou te galulue lava ae seasea lava maua ni tatou mafutaga, ae faafetai i Lona agalelei, ia ua mapue le nuu o manu ae lilo le nuu o mala. Ua talitonu la, o le agalelei lea o le Atua.

Ua sausaunoa foi nisi o sui usufono ma tau aumai le agaga lea e tatou te alo faatasi lo tatou sa. Ia, a mea o ula ia? Aua o le upu lea sa fai ai lau miti. Ou te le i miti la pei o le miti a Aiga i le Tai. Ua ou tau popole i le miti a Aiga i le Tai lau Afioga, leaga o le Minisita, o le teine mai ia matou i tua i si o matou itumalo. Ioe. A o lea ua faaali mai lana miti, ia e le afaina. Ae talosia ia aua ne i miti ai ma le isi aualii ia i luma ma le isi aualii ia i le miti lea e tasi.

Ae o le miti ua aumai i lenei tausaga, o le upu a le Aposetolo i le tusi a Roma fai mai, “Aua ne i faatoilaloina outou e le leaga a ia outou faatoilaloina le leaga i le lelei.” Ua mavae atu ia fatia sa tatou ui mai ai, tauau lava ina faaletonu ai le sa o le atunuu, na tatou vaavaai ai i lenei tausaga ua tuanai atu, ae faafetai i le alofa tunoa o le Atua, o lea ua tuanai atu ia fatia, a o le manatu foi la e le auese ai lenei itumalo. Tatou omai e galulue faatasi ma tatou tapuaia faiva o le Malo aua lo latou alofaiva, ia e tusa ai ma nei mea ua faataatia mai. Ia aua foi ne i vave faasea foi le Malo i ni motugaafa a lenei itu e tuuina atu. Ia afai lava e tuu atu, ia o le matua alofa lava ia e faufautua

ma tuu atu se fautuaga ina ia faufau ai lo tatou sa. A lelei faaaoga, a leaga, ia toe foi mai so matou vaivai.

Ia, ona matou faapea lea, e le umi tele foi sa matou tala. O le lauga foi a Tumua, e le tataea le maotua o se faamoemoe, ae i ai le talitonuga o le a tatai tonu ia i le moa o le ala so matou faamoemoe. E tulaga ese le tatou Fono lenei lau Afioga. O lea sa e faasilasila ua i ai nisi o toa o le Maota ua faailagi le folauga, ua amia e le Atua le soifua. Ia, e avea foi lenei avanoa e avatu ai le matou faamaisega a lenei itumalo i le paia o Aiga, aemaise o itumalo aua le valaau paia a le Atua. Ia o lo o aoao mai pea tatou, e fai lava lenei, fai lena, ae filifaiese le soifua ma le ola i le pule a le Atua.

E i ai le laau lena ua sau nei si o matou aiga fai le ma palaau. O le laau e lanu viole, ou te le i maua lava le igoa o le laau. Ae solomuli mai lau taavale i le 8 i le taeao, se ua fuga fetiitii le laau, ae ou alu atu i le 4 i le afiafi, tulou lava le Maota, ua toulou uma lava. E leai se fua o totoe. Ia ou toe sau foi i le taeao, e faapena. Ae aoao mai pea ia te au, pei o se faamanatu lea ia te au ia, o lou ola lena e te malosi ai, e fuga ma magumagu i le afiafi. E faapea le finagalo o le Atua. A o tatou i ai i mea ia o maliu, e i ai si ou uso sa mamae ma pele le mafutaga i si o matou nuu, ia o lea ua lagia ai le afioaga o aiga ma Aloalii ma ia laua Matua. Ia ua faateia lava, faateia lava i le malosi sa i ai, ae faapena lava le soifuaga. Na pau o lea, ia faamafanafanaina le tausī ma le aiga aemaise foi si o tatou nuu i le valaau a le Atua i le tofa ia Fanualelei.

Ia, na nofonofu lava ma matau i le tulai mai o tootoo, ia tasi lea mea e tulagaese ai tootoo oi latou o sui usufono ua tatou mafutaga talu mai nei ona maea le faiga palota laititi, ia e momoli atu le matou agaga faafetai. I lau lava ia faalogologo, se ua leva ona tapena tamalii nei ma uso nei, aua le valaauina. Ia o le tala lava ia a le tootoo o Tumua, Lufilufi, ia sagai ane ai o le tai, faamanuia le Atua ia maua la outou tofa ma la outou uta fetalai aua le valaauina. Faafetai foi o lea ua atoa le auvaa o Atua, o lea ua faatasi mai isi sui ia o le matou... leaga o Atua o le nuu ae matua ai Lufilufi. O le mea lea faafetai o lea ua atoa le faamoemoe o si o matou itumalo. Ia agalelei le Atua ma sagai ane e fai lo tatou Malo ma fai lo tatou tiute aua se manuia o Samoa la e tapuai mai.

Ia, lea sa oooo nisi faafetai... ia te au lava ia i le tatou agai mai ma le tatou palota laititi lea, e faafetai atu foi pei ona saunoa nisi i le faafoefoeina o ia mea. O lea la e loma nei nai isi matou sui ia e toalua pei e le natia o la e i luma o le faamasinoga. Ae o sa matou tatalo, ana taumafai ona tatou galulue faatasi, semeamanu ua alu i le atoa i luma le tatou sa, ae faasola ia faamoemoega. Ae ui i lea o le a matou tatalo pea, matou tui atu pea ma lafo i aao o le faamasinoga ia faamoemoega.

Ua faalogologo lava i mea o tutupu i tulaga o le tatou faamasinoga. Ia te au foi ia, e tau faanoanoa laititi ai ona pei ona o le a avea fetuatuanaiga o polokiki ma mea ne i te i ua i ai se... Ae ou te talitonu lava e i ai sona aafiaga i o tatou tagata, e tele. Aua a sau nei loa ma pei o le a fai faa-pati le tatou

mea. A o le mea ia i le atunuu, o lea ua manino auofala, tutoatasi, fai le faamaoni, fai le le faaituau ona manaia lava lea o taualumaga o le faamoemoe.

Lau Afioga i le Fofoga Fetalai, e manaomia e lou sui usufono se tala i le tatou vaalele. E manaomia se lipoti tusitusia e tauaao mai i i se i o matou malamalama ai. Ian a ona matou faalogologo lava i luga o leitio, ae se i aumai ni mea aloaia se i faitau i ai sui usufono o le Palemene ma fuafua foi i ai a matou suesuega. O le tatalo atu lea i lau Afioga i le Fofoga Fetalai, o lea e faafofoga mai le Minisita o le tatou Vaalele, ina ne i mea ua tatou vaavaai pitotasi, ae uma ifo ua afaina uma ai tatou ma afaina ai le tatou atunuu. Leaga e leai lava se isi mea e tua i ai, e tua lava i le aufai lafoga ma tua i tagata o lo o taputapu mai i lo tatou faamoemoe.

Ia, o lea ua talosaga atu i le Matagaluega lau Afioga i le Soifua Maloloina, pau lava lea o mea aupito i taua i lenei vaitaimi, lea foi e sau i le tatou Tala o le Tupe, o lea lava e maua mai nai fesoasoani ma ave foi i ai le faamuamua. O lea ua tele fautuaga ma timaiga i lau Afioga, ia lafo atu foi se manatu o lenei itumalo, o ou mama na. E le faatonuina foi e o matou tagata lau Afioga, ae pei na ona tatalo atu, ia o lea ua uma le Covid-19, o le Delta, o le omicron ea po o a ea igoa ua faaigoa ai e tagata popoto nei mea, a o lea lava e le i oo mai lava se mea iinei ia tatou. Afai foi o tilitili alualu mai le tatou atunuu e fia oo mai iinei, leaga o la e latou te iloa, o iinei o lea e faasaoina ma leai ai se faamai e i ai. E i ai la se tagata e fia nofo i le mea e tele ai le faamai ae le fia omai iinei e mapusaga mai i ai. Na pau lava lea o le siaki lelei, ae le o nisi, o tagata o le tatou atunuu sa i ai foi lo latou sao i lo tatou faamoemoe. O le mea lea e tuu atu ai i lau Afioga, e faapena foi so matou manatu.

Lau Afioga i le Minisita o le Soifua Maloloina, ia, ne i tele pitotasi foi lau silasila i le faamai, a o lea e i ai tatou aseta taua o lea ua mautinoa e le o toe lelei ma aoga. Ia o le ala lea i te i ua tatou vaai ae le i i ai lava se tagata Samoa ua mai i le faamai, ae na o tagata ua mai fatu, o mai e faaoga i ai masini i le taimi lenei ma feoti ai, se i tulou, ma feoti ai le atunuu. O le taimi la lenei ua leai ni masini ia, ia, CT Scan, o mea o vailaau e vaai ai le suega o toto, se i silasila ifo lau Afioga i te i ua tatou vaai pitotasi i le faamai ae e le o aafia tatou, ae i ai mea ia e taua. Ia o lona uiga a ta alu atu nei ae fai mai le fomai ia te au po ua e cancer, a, o se faataitaiga. Ou te le talitonu i ai, aua o lea e le i faia se suesuega i mea ia e le i ui i auala ia. O lona uiga, e tetee i ai leaga e le faavaea. Ia, pei o se tuutuualalo lea i lau Afioga i le Minisita.

Ia, o lea lava e talitali mai si o matou falemai i ta taavale foi lea ambulance, ae tuuina atu i lau Afioga e pule lava lau Afioga i se taimi e talafeagai lelei.

Ia, i le tulaga o aoaoga, a ou talanoa nei i pasene o lou itumalo, e fai si maualuluga o tagata ua faaiuina ma le manuia a latou aoga, ae ou te musu ne i te i ua faapea le tatou Maota ua ou faia se tala. Ae e fesootai lava le aoga a le fanau, e le gata o le tiute o le Minisita ma le Ofisa o Aoga, ma le tiute foi o tatou matua. E fesootai lava i taimi o le aoaoina o le fanau. Ou te

matauina lava le isi ou atalii, e vaivai, e vaivai i le aoga. A o le mea ou te faafetai ai, lele ua i ai le Iunivesite, pe sina lava lou ulu, alu e taumafai, o le tiute lea o tatou, aua ne i tatou fiu gofie. Ave lou atalii i le aoga, pe fail mai le isi mea toe tuu atu i le isi mea, e fai fai lava oo i le taimi e matala ai lona mafaufau. Ae aua le uma mai loa o le tausaga 10 po o le tausaga 13 ia ona te i lava lea ua alu atu faapea. A o le tatou atunuu foi, o le tele ia o mea e aoga i ai tupulaga ia e omai. O le faataulelea, ioe, o mea fai a le nuu, o i ina e aoao ai. E alu atu le tagata ma lona faailoga, a o la e saofai mai o la e faia upu a le nuu. Tasi lea aoaoga taua i alo ma fanau, ia toaga e o i le fale o le nuu e faapena ona aoaoina ai.

O le isi mea taua lau Afioga e fia pai i ai, o le siitiaga o le tau o le soifuaga i le taimi nei. Ia, e le o toe na ma le laina le tulaga lea ua i ai le faigata o vaa ma mea uma faapena, e faapoopo uma lava i le tau o le soifuaga ma le siisii i luga. Se i alofa ifo le tatou Malo, ua alualu lava i luga le tau o oloa mai fafo. Ae ou te alu atu nei e faatau lau, tulou lava le Maota, le ipu foi lea e sau ai le suafai ma le supoesi se i tulou, ua ou te i ua \$2.50 ae sa \$2 nei lava ia Tesema. E 25% le siitia o le tau o le meaai. O lona uiga, ua alu foi i luga ma le mea a tatou ia e i totonu o le atunuu. Ia, pei o le tasi lea mea se i tau taotao ifo. Faafetai foi i le Ofisa o Faatoaga ma le polokalame, e toe lalaga tatou taumafa, aua a lava le tatou sapolai i totonu, ia o le a le mea o le a tatou tua ai fua i araisa ma mea mai fafo? Na pau lava lea lau Afioga i le Minisita o Faatoaga, o lau lui lea ia te oe, ua ou vaai i araisa e umi ona preserve le araisa, e umi. Na faataamilo lava le taga araisa lea oo mai i inei toe faataamilomilo i faleoloa. Se i vaai ifo pe leai sina mea e faaumi ai le ola o le tatou talo lea pe a uma ona harvest, uma ona fafai se i tulou. Ia, o lea foi ua aumai le frozen, ae ou te vaai atu toetiti lava faatoluina le tau i le tau o le eletise, e tele le eletise e alu ai i le mea. Ia ae le iloa pe i ai sina vailaau foi lea i uta i le SROS e faaumiumi ai le ola aua le taumafa. Ia, o mea taua na.

O mea ia o lea foi ua taua lau Afioga i le Minisita o Leoleo, ia o lona ua matou fautua atu i mea o fualaau faasaina ma auupega, ae momoli atu foi le faamalo i lau Afioga ona o le tali a lau Matagaluega. Ou te talitonu lava e le faigofie, toe lamatia le soifua o nai o tatou uso a leoleo, ia ae pau lava foi o le latou valaauina.

Ia, lau Afioga i le Fofoga Fetalai, e tau tutusa maua ma le sui usufono lea mai Palauli e le tagisa tele, e leai ni mea tele o manaomia e lenei itumalo. Ae talu mai nei na ou taamilo i Salafai, na ou taamilo ai i aso malolo o le tausaga fou, I'm very impressed, o le tele o nuu ua ou vaai atu ua oso le auala fou, le umi atu oso le auala fou, ioe. O se faailoga lea o se Minisita e ese le maemae ma le ola o lona finagalo e atiae. Ua leva ona sauni le Minisita, Malo faafetai. Aua ne i e vaai pitotasi na o Savaii, ae fai ma vaai atu i Anoamaa ma le itu Atua, ioe. O au ia ou te le manao e avatu sau lisi, pau lava o lea, o lau faamalo i ou faiva. Vaai le ta auala lale e alu i lalo o le vai i Piula, ia na pau lava lona o le mea o tatalo mai ai le pule o le aoga, se i e

alofa ifo, e aoga foi i nai tatou turisi e fesoasoani ai ia i latou ma nai nisi lava. Aua o nei lava mea lau Afioga, se e le fou. So o se Tala o le Tupe lava, o auala galue, o auala galue. O lona uiga, e silafia uma lava e sui usufono o le Maota lenei le taua o le mea o le auala galue. Ia sa papale mai foi nisi o lenei itu i le auala galue, ia ta te fiu lava, auala galue, ae fai mai, tuu se i uma le Paeaiga fai. Ia o fea? Ia o lea lava ua oti atu lava le mea a ua leai atu lava ma se mea. Ia, ae faapena. E ala ona tuitui e tagata ma sui usufono, ona latou te iloa le taua, latou te iloa le taua. O le igoa faa-Peretania, access road, e mafai ai... you can easily access i mea e i ai faatoaga, i mea e fia o i ai. E faapena. Lau Afioga i le Minisita, ia faaauau lau galuega lelei, ia e alofa ifo.

**FOFOGA FETALAI:** Ia se i fai se malologa a le sui usufono mamalu i le saunoaga matagofie ae se i tuu atu le avanoa i le Afioga i le Minisita o Galuega.

**Tofa Hon Olo Fiti Afoa Vaai:** Lau Afioga i le Fofoga Fetalai, na pau lava le mea ou te tulai atu ai ma le agaga faaaloalo, se i koma le uso a sui usufono. E tasi lea o faataitaiga o lau faamatalaga na avatu anapo, ou te le tuliloaina manaoga e faaali mai totonu o le Maota, ae agai lava le matou faamuamua i le matou vaai i asiasiga faapea ma le Matagaluega. Ia o lea e le i saunoa le sui usufono i le auala lea e i Lalomauga ma Falevao, a o la e ua amata, ona o le matou asiasiga ona o le tulaga foi lea e lua nuu, tasi le auala e agai i ai ua matua leaga faia, tulou le Maota. O i ina la lea na faatino vave ai loa le matou galuega, ona na vaaia foi lea o alo ma fanau, ou te iloa e agai mai le pefu o le auala, vaeatu le paia o le Maota, ae le i lauga mai e le i talosaga mai, a o aga na o le matou polokalame i le taimi lenei. Ou te iloa amuia le Afioga i le sui usufono mamalu ua i ai se mea faapea, a o ita ia, e uma lelei le 10 tausaga se i alofa ifo foi fai ifo ia Tapunuu, ia Papalii, se i fai atu ia le auala o Salega o si uso a sui usufono. A o le taimi lenei, ia ua ese foi tatou aga ua tatou alu ai, aua e leai lava se mea e tau o se tau ma sui leaga e le fiafia ai Iesu. Ma le faaaloalo.

**Afioga Hon Tapunuu Niko Lee Hang (Vaimauga 3):** Ia, ou te iloa o lea ua... Lau Afioga pe maua se avanoa?

**FOFOGA FETALAI:** Ia saunoa maia Tapunuu.

**Afioga Hon Tapunuu Niko Lee Hang:** Faafetai mo le avanoa. Ona o lea ua afea foi e le Minisita au i la auala ma le Afioga ia Alaiasa, mo le silafia foi e le sui usufono lea, sa tapena foi e le matou Vaega lona auala lea na talanoa ai, ae pau o le mea ua tupu, ua le toe foi mai. A o le tulaga lea o auala ia e saunoa i ai le Afioga i le Minisita e oo foi la i auala ia e talanoa mai ai i le Itu Salega, sa faatino foi nai a matou galuega i le itumalo lea o le Afioga



i le Minisita. O la e molimau lava e le Matagaluega auala ia ua uma foi ona tatala auala ia. Ne i mea ane la ou te tau faalogologo lava i le tele o saunoaga, o le tele lava o matou galuega lea ua ave uma le viiga i le Minisita nei, a o mea foi na matou tapena ai matou ia. Ae faamalo foi i lou uso, e leai e le o se tau faaleaogaina lou foi taumafai mai. E to lou pulou i lau galuega, o lea lava e te tulai alu asiasi, faafetai. O le tulaga foi lea sa ou faatinoina, ou te le i nofonofo, sa ou fealualuai foi au ia. Ae to lou pulou ua e tulai mai, ua e faaauauina le ta polokalame.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai.

**FOFOGA FETALAI:** Ia, e te faauilavea i...

**Tofa Hon Lauofo Fonotoe Nuafesili Pierre Lauofo:** Ou te faauilavea i lou uso mai Anoamaa 1 ona o lea e tulai atu o le sui usufono o Anoamaa 1. Ae faamalo faafetai o lea ua faalogo atu i le saunoaga a le Afioga i le Minisita o la e ua galueaiina tatou auala i o i Lalomauga ma isi. E pei la e foliga mai ua misi atoa Anoamaa 2, ae pei la o le tulaga lena aua e tatau ona silasila ane lau Afioga i le Minisita e i ai nai auala ia i Anoamaa 2 pei ua pasi atu, ae toe silasila ane i se taimi faamolemole, e tele lava foi nai auala galue na e i ina.

**FOFOGA FETALAI:** Ia se i tulai mai lau Afioga i le Minisita.

**Tofa Hon Olo Fiti Afoa Vaai:** Lau Afioga i le Fofoga Fetalai, masalo ailoga ua le toe oo le Sui Taitai i lona itumalo fua i lona le silafia faatoa uma nei lava ona faata le auala o lona itumalo. Ma o le auala aupito sili lava lena ona umi i Anoamaa, lea na sosoo atu ai ma Anoamaa 1. Ia, o lena.

**FOFOGA FETALAI:** Se i tulai mai lau Afioga i le Sui Taitai.

**Tofa Hon Lauofo Fonotoe Nuafesili Pierre Lauofo:** Lau Afioga i le Fofoga Fetalai, leai e saolele lava le saunoaga a le Afioga i le Minisita. O le auala lea e taua, masalo o le auala lea e agai i Sauniatu, lea e i ai le lotoa foi lea o le Ekalesia Mamona Le Au Paia o Aso e Gata ai, na approve i le isi atu Paeaiga, ae uma e leai se mea na faia. Ae pei la o le Paeaiga lea na tea nei, e pei la e faafasefulu ona ou agai ia Tapunuu, lea la na mafua ai loa ona faata le auala lena. Ae 10 o ou faatali i le auala lena, ioe, i le Afioga ia Papalii ae i ai isi auala ia ua pasi atu i lau silasila ae se i silasila ane i ai lau Afioga.

**FOFOGA FETALAI:** Malo faafetai. Atonu e aoga foi le faasoaa a le Minisita ma le Sui Taitai o le Itu Agai, ae atonu o lea foi ua lagolago mai Tapunuu, e faatupu ai pea lou finagalo aua foi le itumalo. Ae ou te lagona,

afai foi e le i oo i ai lau faatofalaiga, ia leaga o oe e i ai lou pulou faafaifeau, le iloa po o lau tatalo lea ua mafua ai ona galue le Afioga i le Minisita i lou itumalo.

Ia saunoa mai lau Afioga i le sui usufono mamalu.

**Afioga Valasi Luapitofanua Toogamaga Tafito Selesele:** Lau Afioga i le Fofoga Fetalai o le mea e fia faasao.

**FOFOGA FETALAI:** Oi ia se i onosai mai lava le sui usufono mamalu, se i tuu atu le avanoa i le Minisita o le Soifua maloloina.

**Afioga Valasi Luapitofanua Toogamaga Tafito Selesele:** E tasi lava si fasi fuaiupu a le sui usufono lea sa ou maua ona o au o le sui usufono mai Salafai. E pei ua faapito le faiga o Salafai. E pei e faalelogomalie i o matou sui usufono. Ae aua ne i galo i le sui usufono, o Salafai lea ua faiaina ai le latou Pati, lea ua malo. Ae le o faapena la le faiga o le mea, o lea e silasila lelei le Malo ia tutusa lelei ae pei e aveese la le faaupuga lea ua pei ua faapito i Salafai tulaga o galuega. Faamolemole. Faafetai.

**FOFOGA FETALAI:** Ia, e te iloa lava o saafiafiga a le sui usufono mamalu, aua leaga o le sui usufono foi lea sa tulai mai foi i Salafai i le isi vaitaimi. Ou te iloa o le mafuaaga lea pei e te saafi agai Salafai lau Afioga i le sui usufono mamalu?

Ia tulai mai.

**Afioga ALAIASA MOEFAAUOUO MALAGAITUTOGIAI SEPULONA MOANANU:** Faafetai i lau Afioga i le Fofoga Fetalai ua lagalaga foi finagalo o afioga i Minisita aemaise foi o nisi o tootoo o lenei itu i sa matou faamatalaga, ae faafetai tele lava i le Afioga i le Minisita. O lea ua saunoa manino o la e ua faatino. Ia e le gata foi la i Lalomauga, a o i i Manunu o la e ua maua ua fai ai le matou auala laupapa.

Ia o le mea lea e sao ai lau Afioga, o le toatele o le auala ia e pei e ave malosi le feau, a o le mea ia ta te alu lava tatalo i lota afeafe, ia ma tali mai le Atua i le mea lilo, ae aua le oso fua le isi sui i le lauga a le isi sui usufono, alu le sui usufono ia e fai lana talosaga i o i le Minisita. Lau Afioga i le Minisita o Galuega, leaga o lea faatoa tasi lou tausaga. Se i maea lou 5 tausaga, ona avatu loa lea o togi o oulua ma le isi Minisita lea na tulai mai, po o fea o oulua ma le Minisita lea sa sili ona vave lana tautua ma lana auaunaga aua se lelei o le tatou atunuu. Ia...

**FOFOGA FETALAI:** Ua fetau lava ua uma foi lou taimi.

**Afioga ALAIASA MOEFAAUOUO MALAGAITUTOGIAI**

**SEPULONA MOANANU:** Ia o lea o le a faauma atu. Ia, le tapuaiga mau a si ou itumalo aemise Samoa, matou te asuasu atu vaimalu i aai o finagalo. Po o le a foi sa outou matau i se upu a le sui usufono ua le taulelei ma le tautamalii, ia, e faapena lava se agaga, e faamalulu atu, i le paia o Aiga ma Tama, o Tama ma Aiga, ae a le usoga ia Tumua ma Pule. O le paia foi o le itumalo aua le afioaga o Aiga ma le Matua ma le mamalu o le aai, tainane oe le Tumua Lufilufi, le Toaono ma le Saofaiga ma le mamalu i le Tumua ma ou fuaiala. Faafetai mo la outou ou tatalo ua manuia ai lava faiva o lo outou sui usufono. E masani lava ona ou sau ou afe i luga i le matou falemai faaitumalo, siaki e teine lou toto ma le suka. O taimi uma lava la e siaki ai fai mai, sole, matua e fit lava i le mea lea ua i ai. Ou fai atu, ia, o ma talai i le itumalo o lea e maua le malosi o le sui usufono e faaauau ai le galuega.

Ia, lau Afioga i le Tamaitai Palemia faamalo faafetai. Ua maua lava i nisi o sui usufono taimi e te saunoa ai i lau Polokalame. Faafetai foi i le tofa faatupu. Ia e le sii soo foi. Tasi lea mea ou te famanatu atu foi i sui usufono aua o lea ua taua le mea lea o le Good Morning Samoa ma mea faapena. A o le TV2 foi, ioe, a tatou faasee ma ia mea, ona see lea i luma o le tatou sa. Manaia le tala a Olo, e le tau ma sui leaga o le upu lena, fai mai tuu i le Atua o Ia o le tau ma sui. O Ia o le tau ma sui. A fia ai fafaga, a fia inu faainu, ona faafaupue lea o malala ola i le tagata e ita ia oe, ioe. O le mea la lea, e faapena foi se matou tatalo. Tuu ia le tatou o i luga ma talau mai le mau mea, se o faiva o Fiti e lililo. Tatou o faapena, se i tulai mai loa, ia o le a le mea e toe tuu ai tatou faamatalaga ma mea e fai?

O le tatou poloketi lea o le \$1 miliona, e le iloa po o le vaiaso fou e ave ai le resitala a lenei itumalo e lagolagoina. Na pau lava lea o le mea, ia o outou mama na. Aua o matou ia na o le faaamoamotali lava a o outou lea o le a tuu i ai le mamafa o le tapenaga o nei mea.

Ia faamanuia mai le Atua i lau afioga i le Fofoga Fetalai, ia maua lou lalelei i le tino, mafaufau ae sili le agaga. Ia faapea foi le Kapeneta ma le Malo. Ia liliu mai foi isi o matou Itu, ia manuia foi le Taitai ma le sui Taitai, a o la lava tatou te tatalo ia faapena ona toe faafoisia le soifua laulelei i o tatou uso o lo o faapena ona sii gasegase. I le suafa o Iesu, Amene ma Amene.

**FOFOGA FETALAI:** Ua faamalo faafetai saunoa i lau afioga i le sui usufono mamalu o Anoamaa Nu 1. Ou te talitonu foi o lea ua faafofoga ma le totoa le paia o le Maota aemaise foi le Afioga i le Palemia ma le Kapeneta. O lea ua e saunoa faafaufautua aua le agai i luma o le tatou galuega. Ia malo saunoa faafetai foi tofa faatamalii, faufautua aua le agai i luma o le tatou galuega. Ua i ai le manatu o lea ua taunuu mai i le taimi o le tatou malologa. E le o toe toatele foi ni tatou sui usufono o totoe, ae le i oo i le taimi e sausaunoa ai sui o le Komiti.

E aoga foi le tatou malologa ma fotuai mai ai se tatou sui aua le tatou galuega o lea lava e faasolosolo le tatou galuega.

O le mea lea o le a faataatiaese galuega a le Fono Aoaio Faitulafono mo lana malologa masani.

*Na faataatiaese Taulumaga a le Fono Aoaio Faitulafono mo lana malologa masani i le itula e 3:44 i le afiafi, ma toe amatalia i le itula 4:17 i le afiafi.*

**FOFOGA FETALAI:** E faasilasila atu ua toe amatalia nei Taulumaga o le Fono Aoaio Faitulafono.

Ua tatou i ai i le vaega mulimuli o le tatou Fono i lenei aso. E momoli atu le faamalo a le Nofoa, malo le onosai malo le fai o le faiva. E i ai le talitonuga ua maua se faasiligamalosi i le toe taliu mai i le tatou taumafagati o le aoauli.

E na o se faamanatu a le Nofoa i le mamalu o le tatou Palemene. Ua matauina ma le faanoanoa le faalavelaveina soo o a tatou Taulumaga ona o le tatagi soo o a tatou telefoni, ua atagia ai le le mamalu o la tatou galuega. O isi ia Tulafono mo le tausiga o le mamalu o lo tatou Maota pe a tatou tauaofia.

E molimauina atu foi i nisi o Ofisa Sili o Pulega o Matagaluega le tulaga lea. E fautuaina ina ia tausi pea le mamalu o le Palemene. Ia faautagia mai faamolemole e le faatagaina se telefoni i totonu o le Maota.

E faataatiaese a tatou Taulumaga ua maea le saunoaga a le sui usufono mamalu mo Anoamaa Nu 1.

O le avanoa lenei mo se isi sui usufono e fia saunoa.

E matau atu o lea ua sauni mai se tasi o sui usufono matua o le Maota, o le sui mai Satupaitea, Hon Lautafi Fio Selafi Purcell. Lau Afioga i le sui usufono mamalu o Satupaitea.

**Afioga Hon LAUTAFI FIO SELAFI PURCELL (Satupaitea):** E faafetai i lau Afioga i le Fofoga Fetalai, o lea foi ua maea le taliga o le sua, maua foi se faasiligamalosi i lau Afioga ma le mamalu o le Palemene. E faafetai atu i le Ofisa o le Fono mo le saunia o le tatou faamalositino.

A o le i faia se tala, e muamua pea ona faatulou le paia o le Maota nei. E faatalofa atu foi i sui usufono uma.

Tulou lau afioga i le Fofoga Fetalai, faatulou atu i lau Afioga i le Palemia, le Sui Palemia, le mamalu i le Kapeneta, Minisita Lagolago i lena Itu o le tatou Maota nei.

Ia liliu mai i lenei Itu, susu o le sui Taitai, ma sui usufono o lenei Itu o le tatou Palemene. O le tatou Fono muamua lenei o lenei tausaga.

E faatalofa i le paia o Samoa, i ona tupu ma ee.

O lo o faafogafoga mai le tapuaiga a Le Ao Mamalu o le tatou Malo ma le Masiofo, Sui o le Fono o Sui Tofia ma le Faletua, le Faamasino Sili, o lea ua ou faalogo ua i ai le faletua o le Faamasino Sili, ia Faamasino Sili ma lou Faletua. O le vasega o Faamasinoga.

O le tapuaiga a Auauna a le Atua i Fatafaitaulaga e fia o lo o tatalo aua se manuia o Samoa.

E faatalofa foi i o tatou uso i le Motu i Sasae i la outou tapuaiga. E tatou te valavala lava a o tatou lava o uso, malo le soifua malo le tapuai.

E faamalo atu i si ou itumalo pele o Satupaitea. E mai lava i Malaeaoga seia paia Falepau. Susu Asiata o le Vaaimalae. Susu le Aiga Sa Moeleoi, le Aiga Muaimale i Tofiga, Afio Alo o Lilomaiava Aiga Sa Valemua ma Suafa o le Fauatea. Afifio Tapaaufanua o Asiata tainane le Afifio o Tapaaufanua o Tonumaiepa. Ia alalatai le mamalu o le Nofoituaiga ia te oe le Alataua. O Tapaaulefano o Nofopule ma Lona toafia.

E faatalofa atu foi i le tapuaiga a faletua ma tausi, saoa ma le malosia o le tatou nuu.

E faatalofa atu i Auauna a le Atua o lo o tapuai i totonu o Satupaitea. Ua faamalo le tauave o la outou pitolaau o le tauasuina lea o le vai ole ola aua agaga o si o tatou itumalo. O le faapai atu lea i lena itula o le aso.

Lau Afioa i le Fofoga Fetalai, e le mafai lava ona le oo le mafaufau o au nei i le matagofie lea ua tilotilo atu i ai ma faalogo atu i ai taliga. I faamatalaga o aga foi ua tatou vaaia i le Fono lena. O le eseese ma le Fono ua tea. Ou te le toe fia tepa lava i tua lau Afioa. Ou te faafetai atu i lau tatalo na amata ai le tatou Fono i le Aso Lua, i lau saunoaga, e alo i luma lo tatou vaa. Aua tatou te toe fai ma tatou toe tepa i tua. O lea la ou te faalogologo atu foi i sui usufono i le agaga lena. O le agaga foi lena o le sui usufono lena o Satupaitea. Aua e leai lava se mea e maua i le tatou toe o i tua. O lea ua taumuaava lo tatou sa, ia tatou agai lea i luma. A i ai se mea e ala ai ona toe tau tepa i tua, o se mea e aumai e faamalamalama ai le agai lea i luma o le tatou malaga. A o le agaga lava ia, omai laia tatou alo faatasi lo tatou vaa. E muamua lava la outou Faigamalo ona o outou lea ua i ai le Faigamalo, a o matou e taotaotua atu lava, ma avatu ni lapataiga ma avatu ni fautuaga. O le faiga lena o mea nei o Vaega Faaupufai.

O lou tulai atu, o lou talitonuga, o le tulaga lea e i ai lo tatou atunuu lau afioa, i le tulai mai o le faamai lena, o se tulaga lea e silisili ona taua ia te au, ia le mea lea e i ai a tatou i le tulai mai o le faamai. Ona ou faapea lea, o le a le tatou mea lea e fai, ua ala ai ona le oo mai le faamai i nei? Ou te talitonu, o le tatou tatalo ma le tatou pipii pea i le Atua lea e saogalemu ai Samoa.

Ou te faamalo ia Samoa atoa, aua e le faapea na o tatou lea e i i tatou te popole i le mea lena. E le faapea foi na o le vaega o le Falemai, e leai. O Samoa atoa lava lea e aafia i le faamai lena. E moni e le i oo mai le faamai ma pisia ai se isi i totonu, a o le olaga sa o tatou ola mai ai lea ua aafia i i. A

lea ua le mafai ona tatou feoi, ua le mafai ona tatou toe o i Niu Sila, ua le mafai ona toe omai o tatou aiga, ua saisaitia lo tatou saolotoga, e oo lava i tamaiti aoga lea na masani ona o e sikolasipi. O tulaga uma faapena o lea ua saisaitia. O le uiga lena o lau tala, o Samoa atoa e ave i ai le faamalo. Ua faamalo le onosai, e le faigofie le 2 tausaga lenei sa o tatou faafegai ai ma le Koviti-19. E uma atu le misela, oso mai le Koviti-19.

E momoli atu le faamalo ia Samoa atoa. Ua faamalo i lo outou onosai. Ua faamalo lo outou faatuatua i le Atua.

E momoli atu le faamalo i le Faigamalo ua tulai mai. O lea ua outou omai ma afio mai, o lea ua outou silasila e i ai faiga faavae, faiga autu, ma ala o mea sa faatu e lenei foi Vaega i le taimi o i ina. O lea ua outou silasila i mea lelei faaauau, mea lelei faaauau. Aua e leaga tou te pai mai, o lo o lelei lava le faafoefoega o le faamai lenei.

Aua a na faaletonu le tulaga i le puipuiga o Samoa i le faamai lenei, ailoga tatou te nonofo faapea. Ailoga? Ae o le mea lea, o i e iloa ai, e mafai e Vaega Faaupufai e eseese o latou finagalo i nisi o taimi, ona galulue faatasi mo le manuia o Samoa.

O i tonu lava le faataitaiga lea, o lea ua tatou galulue faatasi. O a ni mea na o matou faia, ua outou omai fatufatu, faalelei, o lea lava la e alu ai lava tatou.

O le threat o le faamai po o le lamatia o le faamai ia Samoa, e le i taitai lava ona uma. O lea ua ou faatusaina le faamai lenei, ia te au lava ia ma sou manatu o le Koviti-19 ma lana fanau lea ua omai. Na tatou faapea ai e sau na o le Koviti-19 e asiasi mai, tatou alu loa i ai fai uma mea uma. A o lea ua tatou faalogo o la ua i ai le isi, ua alu atu ma le isi, e le iloa pe toe i ai foi ma se isi tamaititi. O lea ua sau le Delta sau le Omicron, ua 3 mea ia ua tatou faasaga i ai.

O le tatalo, tumau lo tatou faatuatua, tumau lo tatou galulue faamaoni. Le Matagaluega o le Soifua Maloloina, ua faamalo, e to le pulou. E pei foi ona saunoa nisi o sui usufono. O outou na amata mai lava i le amataga, 2 ma le afa tausaga, o galulue pea. Atonu o le Atua lena e foaia le malosi ia te outou.

O le vaega lea o le NEOC, o le taimi o matou i ai, o aso uma aso uma e fonu ai ma le Komiti lea. O lea e oo mai lava i le taimi nei, o la lava e fai. Ua faamalo le onosai, aua tou te faalogologotiga, o outou lea e faamoemoe atu i ai Samoa. O fautuaga lelei e aumai i le Kapeneta ma le Faigamalo, o le soifua maloloina lena o le tatou atunuu.

Lau Afioga i le Fofoga Fetalai, o se faapai atu lena o le sui usufono mo Satupaitea e uiga i le tulaga lea ua oo mai i ai tatou. O lou talitonuga, o le finagalo o le Atua lea e galue i totonu o tatou. O lea lava e saogalemu ai si o tatou atunuu.

Lau Afioga i le Minisita o le Soifua Maloloina e momoli atu le faamalo. E faamalo atu lava i fuafuaga uma o lo o fai mo le puipuia o Samoa. O galuega o lo o fai i aso uma e le faigofie. A o lo o tulai mai lau afioga, o lo o iloa lava i le faatinoga o galuega ma le vaaiga o le Matagaluega. O lea lava e le

o i ai se faaletonu. E faafetai i lau Afioga i le faagalueaina o ni fuafuaga sa i ai muamua foi. E pei o lea sa taua e nisi o sui usufono, o fale o alii fomai mo falemai i tua. E leaga e lavea ai foi si ou falemai. Ua leva ona ou manao i ia mea, a o lea na e afio atu ta talanoa, o lea foi ua i ai i totonu o le Tala o le Tupe, ia le tupe e faatupe ai ia falemai nei. E faatoa iloa lea ua toe oo le falemai o nisi o itumalo i se tulaga faapea, nofo ai le fomai, 24 itula i se fale o nofo ai lava i totonu o le lotoa o le falemai, faafetai mo ni fuafuaga na fai i le la faigamalo, ia ae o lea ua e afio mai faatino.

O le faafetai foi e fia tuu atu i lau afioga ona o le taavale a le falemai, le ambulance. Ia atonu pe 6 ea ia falemai na na faamanuiaina. Faafetai i lau afioga ua lavea atu ai ma le falemai o Satupaitea i le tulaga lena. Ia ua ou faalogo e le misi se aso pe tai faalua tai faatolu ona malaga le ambulance lea e ao mai tagata i le falemai o lo o faaoga tataua ia aseta a le Malo.

Ia o le talosaga atu lava i lau afioga i le gaosiga o fale nei aua ou te lagona e na o le \$3 miliona. Ou te lagona a sese le fuafuaga a le Matagaluega, e uma ifo ua le tofu le falemai ma le fomai. Ia ae a pe a tasi lava le design, tasi le design tutusa lava fale uma, tutusa foi le tau, ia ona fuafua lea o le Matagaluega ia pe o le a le tau e tofufufusia uma ai ia falemai uma nei e manaomia, ia ma le latou fale lea pe 2 pe 3 potumoe, e leai se eseese. Ia aua a tuu nei e fai lava e le falemai ia ma le itumalo, o lona uiga e fai le fogafalelua o le isi, ia ona aumai lea o le pili i lau afioga, ia toetiiti uma ai ia le tatou tupe.

Ae o se talosaga, e pau lava o le tuualalo foi lea, ona ia fai pea e le kamuta a le itumalo ia. E lelei lena e i ai foi le sense of ownership of the project. A i ai foi se mea e faaletonu, ia e na ona vili atu lava, oso mai e fai le mea lea aua o la e nofo i gatai i tua o le falemai. O se mea faapena aua a tuu nei foi e fai e konekarate, a i ai la se mea e faaletonu, ia e fiu e faatalitali mai ia le konekarate e alu atu nei i Apia e fai se mea a la ua manaomia, ona o le falemai le mea e tatou te talanoa ai, e manaomia loa se mea, ua manaomia nei lava. E na o se tuualalo lava i lau afioga, ia aua le agai i luma ia le poloketi lea ma ia tulai mai i se tulaga lelei.

Ia o lea ou te fai lava ma ou faalogologo atu lau afioga i le mea lea o le CT Scan lea e tautau soo, ia ua fai si leva o le mataupu lena. Lea foi na i le taimi a ou i ai i le ACC. Ia aua o le ACC lea na atonu lava e i ai ni nai feutagaiga o lo o tuai ai, a ua leva ona tataua ona aumai. Ua leva na i ai ia le tupe e faatupe ai. Ia e na ona tuu atu foi i le Minisita o le ACC, ia pe i ai se mea ua faaletonu ua tuai ai, ae ua leva ona tataua ona aumai ia le tatou scan lea. Ua manaomia tele lava, lea ua uma ona fai mai lau... leaga o lea ou te talanoa i le mea lea o le CT Scan.

Ia o lea la o le a ou oo atu ai i le isi foi Scan lea. Ou te le toe fai la i ai se faamatalaga i le afioga i le Minisita o Tupe Maua. Ia ou te le tau faamatala atua le aoga o lena mea, mai lava i le mau galuega mai lava i le puipuia ai o le saogalemu o Samoa i le maua uma o oloa e tataua ona tiute, i le sao o

tiute e puipuia le Matagaluega aua le tuuaia i tulaga faapea o lo o fai ni tulaga.

A toe manatu i tua lau afioga i le Fofoga Fetalai i le 2013, 2014 lea sa tatou i ai i le komiti lea sa tatou suesueina galuega lea. E tasi la lea mea sa o tatou talatalanoa i ai maimau e pe ana i ai se mea e aumai ia container nei alu ai i totonu. E le tau o atu nai tama foi ia o le Custom aumai tatala, ia aumai ave i tua e pei o lea na taua e le afioga i le Palemia, le Green Lane, e aumai la e ave i tua, ae masalomia ai foi ia le afaigaluega. Fai mai la ua avatu i tua la ua monomono i ai tupe, ia ona charge lea o tiute o apa eleni, ae leai o pusa pisupo la e i totonu. O tulaga uma ia o le a foia i le mea lea.

O le uiga la o lau tala lau afioga, o mafaufauga ia na fai ai aua na o tatou i ai ma le Minisita lea ua tea atu lea o le na aumaia le aitia lea, ma le alii lea le susuga i le Failautusi o le Fono lea sa o tatou i ai uma lava le tatou vaega na, o mafaufauga na o le tatou komiti lea ua fua mai. O lea o le a faafaigofie uma ai galuega o le Ofisa o Tiute, e le taumate, o le a maua uma lava ia tatou tupe e tatau ona maua aua tasi lea mea. O lea ou te tilotilo atu i fuafuga a le tatou Malo, e naunau ia maua uma tupe. Tasi la lea mea lau afioga i le Minisita o le a ao uma mai ai tupe, aua e tasi lava lenei mea e tuuaia ai le Matagaluega, o la e le o sao tiute la e fai.

O le tonu la o le masini lenei, faafetai, faafetai i lau afioga i le Palemia ia ma le faigamalo o lea e aumai i le vaiaso lea po o ona tua atu. Ia aua tasi foi lea mea e ala ona pisapisa i le TIMS o le a aveese, ia ae o lea e leai se... e tasi lena o mea e maua ai ia tatou tupe. Ia aua o tatou tupe maua e tatau ona o tatou apoapo mai. Ia ona taunuu lea o tatou fuafuaga ia alualu mamao ina ia maua pea a tatou tupe e tatau ona maua.

Ia nai mea laiti lava lea lau afioga e mo le lautele, ia lau afioga i le Minisita o Leoleo, o lea foi ua uma ona saunoa atu ia le tele o sui usufono, ae e tatau pea ona oo atu se leo i lau afioga. O le taimi faigata lea ua e tulai mai ai lau afioga i le Minisita. O le taimi lenei e le o toe po se lilo i le faaletonu lea ua aliali mai i le tele o laau faasaina, malolosi tuu ia le mariuana, ae o lau fuafua i maruana ia, ua pei o se sikaleti.

Ua ese le tulaga lea ua oo i ai ia fualaa faasaina, ese lava. Ua oo lava i luga o le level, ia e faaletonu ai le saogalemu o le atunuu. Ua le o toe faapea foi ia o tamaiti i nuu i tua la e o e toto mea ia, leai. O tama ia ua oo i ai le aisa, e le deal ai le vaega lea ua oo i mariuana ma tulaga na e atu toto i tua o le fale, ia o atu i le isi aso aumai faatau i le maketi, leai la. O le tulaga na e oo loa i le level lea, ona iloa loa lea, ua ese foi ia ituaiga tagata ia e faaoga mea nei. E le gata i le tamaoiga o tagata nei, i le atamai o tagata nei, tulaga uma faapena, o latou na o lea e faagasoloa le mea lea.

Afai e oo i lalo i tagata foi ia o tamaiti aoga, o tagata na e uunai le mea, those are the pushers. Ae o tagata o lea e nonofo ma tupe, ma faafoeina ma faatafe le oa o le mea lea, ia o le tulaga la lena e avatu le fautuaga i lau afioga, aua ne i i ai se maa e te le sueina. Don't leave any stone unturn i le



masalosaloga i mea nei. O lea ua aliali mai, ua oo i Ofisa o le Malo. E tasi le Ofisa lea ua maua, imagine la nisi tagata o i ai? A, imagine e pei ona fai atu, e popoto tagata nei, e le o ni tagata e faaletonu, e popoto e nana, e popoto e fai, so there are complicated operations lea e tutupu ai mea ia. E le faapea foi e aumai mai lava i o fai mai le aisa, leai lea e aumai lava iinei fai ai. Ua i ai la tagata ia lea e iinei, e matua popoto lava i le faiga o le mea.

E latou te iloa foi le aumaiga o mea i totonu, e aumai le isi component, aumai le isi component, aumai le isi component, e le maua la e maile ia mea ia taitasi seiloga e tuufaatasi ona maua lea. O mea uma ia e tatau ona malamalama uma i ai ia le tatou Matagaluega. E tatau ona ave nisi i fafo ave e aoga faalelei ia ia i le tomai e puipui le oo mai o mea nei. O lea ua o tatou iloa, sau lava mea nei o drugs, heavy drugs, sau loa heavy drugs, sau foi loa ma heavy weapons. E le faapea e aumai ia heavy drugs ae ave ia heavy weapons e fai ai le a? The two go hand in hand, e i ai loa se isi e threaten ina operation lea, e na o fana e latou te fetoi. So o le naunautai lina ma se faaeteetega lina ia te au ia.

O le taimi sa ou i ai i Niu Sila na faatoa ofi atu le mea lea o le methamphetamine lea e faaigoa o le aisa faatoa ofi atu i totonu 25 tausaga talu ai. Na matua leiloa foi e leoleo po o a nei mea? It took them a while e suesue ae o lea ua see mai le mea iinei. O tagata foi nei o drugs, e latou te iloa lelei lava auala e oso ai le mea. O lea la e latou te iloa le Pasefika it's an easy way in mo maketi la i fafo. O le faalavelave o le vaega, e oo mai iinei, ona tuu foi lea o le sea a iinei ia. Ae ave le mea po o Asia po o Ausetalia, Amerika po o fea lea e i ai.

We have to be totally, totally on top of our game pe a oo i le mea lea lau Afioga i le Minisita o Leoleo o mama na, e pei ona ou fai atu e le faigofie, o le taimi faigata ua e tulai mai ai, leaga o lea ua fai ma maua mai mea nei. O lona uiga, there is a lot of things around. O lea e tele mea ia e fai ae o lea faatoa maua o le tip o le iceberg tatou mea ia e maua. Ia ae na ona tuu atu faapena i lau afioga, ia e te silasila i ai ma le Matagaluega. Faafetai atu i galuega lelei o lo o fai e le Matagaluega i le taimi o le Kerisimasi sa ou fealuai i Savaii, ia fai lava ia latou siaki, siaki laisene, siaki le register ina o taavale, pepa foi ia o taavale, ou fai atu, malo, malo lava le fai o le faiva. E sao e po lava o fai galuega a nai tama i na i Vaitoomuli ma sau i i Salelologa. O le faiga lina e amata ona fefefe le aufeoai foi ia o la e latou te iloa o la e solitulafono i mea faapena.

Ia lau afioga i le Minisita o Galuega, ia e momoli atu lau faafetai, lau afioga ou te iloa la toetiiti lava uma le ta auala la e i Vaega, ia o le auala lava foi sa tapena i le nofoaiga talu ai, ia ae o lea na e oo mai loa amata loa, ia ma o la ua ou faalogo la ua toetiiti lava uma. Faafetai atu i lau fesoasoani mai i le atinae o si ou nuu, na pau lava lina o le nuu e leai se auala galue ia ae lea ua fai, faafetai tele.

O le talosaga o lo o i ai nei, e tutusa uma lava matou ia mai Savaii, maua ma si ou uso mai i o i Palauli, leaga o le Laulua e faapena. E le soona fitivale ma e le soona manao i ni mea. Ia aua o le Tala o le Tupe lea e na o le \$21 miliona, o le a le mea o le a maua ai? Ae tuu se i oo i le Tupe e maua ai ni mea ia ma toe lauga atu loa ma Lagaaia i le mea e manao ai ia le ma Laulua. Ae i le po lea o le Aso Toonai, lea na tea nei lea na fai ai le warning o le Tsunami, ia afai ua e silasila i si ou itumalo, e maulalo lava. Ua leva foi na avatu ia talosaga i se taligalu. Na ma o foi ma le isi Minisita i le isi vaitaimi fua, 480 mita le umi ia le taligalu e manaomia, alu atu lava i le fua i le tuaoi ma pitonuu, tau lava i Satufia, ia aua la mea ia.

Ia ae pei na uma loa le tsunami i le 2009, te i foi lava lea pei ua uma ua le toe... Ia lea la na toe oso le mea lea, e moi e leai se isi na aafia, ae na lolovai uma le aualatele. Na alu le galu i luga, na sau lava mai i tai tau i uta, ia o se talosaga lena se i toe avatu se tusi aloaia, ia ae o lea ua tupu le mea lea i le taimi lea na tupu faafuasei ai, ia o le talosaga lena, ae faamau ane. Ae ou te oo atu lava i se taimi e ta te talanoa ma aveatu ai foi se isi tusi aloaia, e pei ona fai atu na aveatu muamua ae o le tala, o mea nei e fai i lalo o le climate fund, ia lea la ua ou faalogo ua leai se climate change fund. E pei ua alu lava Triumph ma ave ana tupe sa i totonu i i, ia ma uma atu ai lava ma na mea. Ia ae o mea na sa faamoemoe i ai, a leaga gataifale, tupe lea e faamoemoe e fai ai ia taligalu. Ia ma lou faaaloalo.

Ia o lea ua ou faalogo tasi lava nai tamai galuega la... la e fai ia le maintenance i lou auala o Satupaitea road, lau afioga i le Minisita, e lua lava nai patupatu na na oo mai i ai le nuu o Satufia semeamanu o la e fai ia le auala. O la e galueina ia le maintenance o le auala lea, e na o i ina lava i Satufia na ua uma ona faasino i le Tamaitai Pule luma o le mea na e i ai le Pre School, ma le mea na e i ai le falesa e pau lava na, leaga ua fai si saosaoa o taavale, ia tuu atu i autafa o lau afioga.

Lau afioga i le Minisita o Faatoaga, ia malo le toe taulagalaga i mea nei sa e taumafai foi i le taimi o e Minisita. O le taumafaiga o tatou faifaatoaga laiti ia aemaise ia o tatou mea i Savaii. O lea ua ou vaai atu i le Tala o le Tupe, ia o lea ua leai se tatou faaaliga faatoaga, ia ae o lea o le a aumai le vaegatupe e fai ai ia le fale la o le Pack House. Ia malo, malo lou sogasoga mo mea lelei mo le tatou motu ia aua e oso foi le fia galue ma le toaga e fai ia fua o faatoaga e ave i fafo ia pe a lelei le mea e aumai fai ai i ina i Salelologa. E pei o tatou o si fasimea lava e avanoa e avatu fai ai, ia ae ua naunau mai foi nai tagata e pei o Niu Sila e lau atu mea i inei, ae o le popolega lena. Ae faafetai o lena ua ae se tofa i le tulaga lena, ia e toe faaleleia ai le tatou fale lena. Ia faapea foi le faiga o le tatou feed mill mo tatou manu i meatuaolo ma tulaga faapena, malo.

E faafetai o lea ou te vaai atu o lea e faataua le tatou fale lea e i Otahuhu. O le fale lena ou te iloa lava e au ia e under utilize le fale lena, atonu o le taimi na fai ai, ia ae oso mai loa ma le Koviti, uma loa ma tatou mea sa lau

i o mai i lalo o le STEC. Ae o lea ou te vaai atu o lea e faaauau pea le faataua, ia ou te lagona o le lumanai lena o tatou i Niu Sila. Ae faamalo o lea e suesue ia ni tatou maketi, ia ou te lagona o i tonu lava o i le isi fale e mafai ona faaaoaga e fai ai ia maketi aua nai o tatou tagata e avatu ai nai a latou oloa mai i inei, ia e faatau i Otahuhu. Faafetai foi o lea e vaai atu i le fuafuaga mo le National Export Authority, ia o mea lelei uma mea nei, pe a oo ina taunuu mai, ia ona faigofie lea ona fesootai ia tatou maketi, ia ma le Authority lea e tele ai foi le loto naunau o nai o tatou tagata e lau ia latou oloa i fafo ia e maua mai ai le tamaoaiga.

Lau afioga i le Minisita o le tatou vaalele, ia atonu o lea sa lauga se tasi o uso i le mataupu lenei. Ou te le o iloa tonu pe o fea ua oo i ai ia fuafuaga a le Malo. Ou te musu foi la e fai atu se tala i te i ua faapea mai Olo, ia na foi ua e faalogo i tala ave. Ia aua e ala foi la ona ou le iloa le mea lea e i ai, ona e le o sau se faamalamalama aloaia o le press release lea official a le Malo ua toe faafoi le vaalele pe o le release lenei, o lea e taunuu mai ia le vaalele i le vaiaso fou.

O mea la na, ona iloa ai lea e matou, ae e ala la ona ou lauga pea i ai, ona o se atinae sa tele ai foi si ou taimi o le faigamalo lenei, sa taumafai ai. E toeitiiti lua tausaga o taumafai faiga nei, atonu o na foi e te tau lava i faamaumauga, e le o se mea faatoa fai ina ua tau le palota. Pe o se mea faatoa fai ina ua oso le Koviti. Leai ua leva lava na fai, ae sa taumafai lava e fai i faiga e mafai ona taunuu mai ia lenei atinae ia ma galue mo Samoa. Afai la ua oo mai foi ia lo outou faigamalo pe o le a le tulaga ua oo i ai, ia ae o lea ua avatu ia se matou tuualalo, la ua avatu ia se matou fautuaga. Leaga o lea na fai atu, ua le iloa pe o fea tonu le mea lea e i ai. Ae sa avatu lava le fautuaga mauamua, ia se i tagai ane lava, ia o fuafuaga nei sa fuafua e le faigamalo nei, fuafua lava ina ia maua lava le tupe o le vaalele i nai malaga ia e fealuai nei, ia ma maua ia se lisi e sili ona taugofie i le 12 masina. O lea lava ou te tilotilo atu, ia o lea e feoloolo lava ia nai a tatou vaalele ia e... ia nai a tatou malaga ia e feoi.

Ou vaai atu i nei masina nei pe e 7 ea malaga, ia o charters na e le taugofie. O tupe uma na na faamoemoe e maua e tatou Qantas ma le Air New Zealand ia ma nisi malaga, ia aua o lea e tau suesue foi ni vaalele e ave ai ia le tatou ia pe a tele le ia i tai. Ia e aumai ai ia tatou vailaau, tatou tui ia ma nisi lava mea e tulai mai, e pei o le taimi lenei, e fuafua, ae la e maua lava avanoa e fai ai ia faigamalaga. O tulaga na sa fuafua ai le faigamalo nei. Ia afai lava te i ua faapea mai ia le atunuu, ai sa faapaole le faiga mo le atinae lenei. E leai, leai lava. Sa matua fai lava i le mea e gata ai le mafai, ina ia taunuu mai ia le vaalele.

Aua o le mea tonu lava ia, ana faapea e le suia ia le faigamalo, ua leva ona fealuai le vaalele i inei. O le talitonuga ia lena o le faigamalo lea e i ai nei i le sustainable o le vaalele, tusa lava pe o lea e i ai le faamai, e maua lava ia avanoa e maua ai tupe o le tatou vaalele e tumau ai o le vaalele a Samoa. Ia

ae e pei ona fai atu, o na ua taatia atu, i le faigamalo ae tatau pea ona faaoo atu se leo ne i pea mai le atunuu ai sa faatalapelo le faiga o le matou tapenaga.

O le isi mea e faamanatu atu pea i lau afioga i le Minisita, na ou faalogologo lava i vaega lea o galuega faavaitaimi. Na ou faalogologo atu lava pe o le masina nei po o ua lua masina, ua tau fai lava se tele o mea ia ua tutupu mai i Ausetalia. E le gata i le vaega lea na fai ai lau saunoaga i le isi taeao o le mea foi lea o le mulilua ma le o atu i inei tiai ia taitoalua ae fai ia latou toalua i o, ia o se vaivaiga faaletagata ua le iloa pe o le a se mea o le a fai i ai.

O le tulaga lea e tulai mai, e pei ia avea foi le tele o avanoa ma mea ua maua e o tatou tagata e o ai i fafo, ua o atu ai fai amioga faapenei. Ua le gata la i tulaga ia e pei ona ou taua, ae ua i ai foi latou ua fai nisi auala piopio. O le aufaifaatoaga ia i Ausetalia ou te iloa ua toatele lava... ua toatele atu ia Ausetalia nai lo Niu Sila. Ma e sa faigata foi ona faamautu tagata nei. E o o tatou tagata e faigaluega ai. O lou popolega la, leaga o lea ua amata ona sau ia faamatalaga, faapea ua i ai le mea foi lea o le abuse o tagata. Ua le totogia e totogi sao atu ai, ua tele isi tupe ua aveese mai i o latou totogi. E tele lava ia mea.

E talosaga atu ai i lau afioga, o lea sa ou talosagaina i le fonotaga na tea, se i silasila pe ua le tatau ona i ai se isi o tatou tagata se Liaison officer aemaise lava o Ausetalia, leaga e fai si tele o le nuu. E le mafai e si tama la e toatasi la e i ai, ia ona tau fofu uma ia le tele o faafitauli nei aua o le aoga lena o le tagata lea, e silasila pe o lelei uma ia le faiga o tatou tagata faigaluega la e o i fafo. I te i ua avatu le naunau o tatou e o i o, ia ma fai ai foi ni faiga faalefetui a e ana galuega. I le taimi sa ou alu ma talanoa i tagata nei, o le tala sa ou fai i ai, pe o le a le matitiva o tagata Samoa, e sa, sa ona faigaluega se tagata Samoa i se tagata e latou te faia ia ni auala piopio. Ia e matou te toe o lava i Samoa, ia e pei ona fai atu, ne i te i ua avea ia lo tatou naunau atu, ma le latou naunau mai e maua atu tagata, ae avatu i o faaletonu le faiga.

Ia o le tuualalo i lau afioga, ia se i tagai ane i ai, e ese foi ia tulaga ia e tau tulai mai, ia lea e aafia ai ma le afioga i le Minisita o Leoleo, ia o lea foi ua maua nisi foi o le Matagaluega ua fai foi ni auala le fetui, lea ua o ai tagata e le tatau ona o. E mataulia la, o tagata ia sa le tatau ona o, la ua o atu i o faifaimeavalea ai. Lea ua fai ia lipoti a leoleo e sese, ia o lea ua sao ai i o, ae o tagata e le tatau ona o. E undermine uma la e tagata ia faiga nei, le lelei o le poloketi lenei. O se poloketi e le tautausiligia ia lona aoga i Samoa ae o lea e ono lapelapea i tulaga faapea.

Lau afioga i le Fofoga Fetala, ia o le tele ia o isi mea e ta te fia tautala i ai, ae e ta te alofa atu i lau afioga lea e vaai atu o lena e fai lava mae tilotilo i le uati. Ia ona ou faapea ai lea, o le a tuu nisi mea, aua o le Tala o le Tupe, malo i lau afioga i le Minisita. E le o se tupe tele ia lenei Tala o le Tupe. Ma e leai foi la se mea e umi ona tautala i ai.

E pau le mea faafetai ua toe maua mai ia le tai \$2 miliona ia ma le EPC i le CSO lea ua toe maua, aua na tasi lava lau tilotilo ua leai i le budget, ia faapea

ua tupu le mea i i. Leaga e le mafai, o au sa i i i le Board lea o le CSO, e le mafai ona lava le tupe, pe oo lava i le \$5 miliona e le lava. Ae lea la ua aveese le... faafetai o lea ua toe tuu mai i totonu, o le tatou communities service, obligation a le Malo e fesoasoani i tagata tua aemaise tagata o le aulimavaivai. Ia faafetai o lea ua toe tuuina mai, o le mea taua lena ia te au i le paketi lena.

O isi mea uma o le Tala o le Tupe, o mea e faaauau ai ia galuega, business as usual, ae faamalo atu, taetae lava maa ae lea ua maua, a lelei lava le popoga o tatou paaga mai i fafo, ia e maua mai tupe e fai ai ia tatou Supplementary faapenei.

Ia lau afioga i le Fofoga Fetalai, ia ua iu ai i i se leo o Satupaitea. E toe tele foi nisi taimi o i luma, ae tau ina faamanuia mai le Atua i si o tatou atunuu, ia o tatou ola pea i se olaga filemu ia ma le olaga saogalemu.

Lau afioga i le Tamaitai Palemia ma lau faigamalo, ia alo ane laia o le tatou vaa e fau tele. E pei ona ou fai atu, o tatou o lea ua taumuaava ia le tatou vaa, ia tatou alo lea i le mea e maua ai le manuia ia mo tatou tagata.

Manuia lau afioga i le Fofoga Fetalai, manuia le usugafono a Samoa, ia ae ola le leo o Lautafi soifua.

**FOFOGA FETALAI:** Ua faamalo tanoa, malo foi sausaunoa i lau afioga i le sui usufono mamalu o Satupaitea, Hon Lautafi Fio Selafi Purcell, ia faafetai foi le tofa faasapalii ma le faatoeaina. Faafetai foi o lea ua e saunoa manino, o lea foi sa galue i le Kapeneta i le tele foi o tausaga ia malo o lea ua faasoa o le a galulue faatasi ma le tatou faigamalo ia aua lava le alu i luma le manuia o le tatou atunuu. O le mea lea faafetai mo fautuaga ia aemaise foi o timaiga ia aua foi le aloina o le tatou sa e tatou te galulue faatasi ai.

Ia malo faafetai malo saunoa. Ia o le avanoa lena i se tasi o sui usufono e fia saunoa. Ia o lea ua matau atu o lea ua tulai mai ia le sui usufono o Vaimauga Nu.2, ia Lenatai Victor Faafoi Tamapua. Ia o le taimi lena o le sui usufono mamalu.

**Afioga LENATAI VICTOR FAAFOI TAMAPUA (Vaimauga Nu.2.):** Faafetai i lau afioga o le Fofoga o le Maota e tusa ai foi ma le avanoa, ia ae fia muai faafetai e momoli le faafetai ma le viiga i le Atua i lena itula ona o Lona alofa ma Lona agalelei ua tatou aulia ia lena taimi o le tatou galuega i lena itula o le afiafi. Ia viia pea Lona alofa ma Lona agalelei ona e matauina, ia o lo o maua pea le soifua laulelei i lau Afioga i le Fofoga o le Maota, ia tainane foi le soifua manuia i le Tamaitai Palemia, Sui Palemia ma lena itu o le Maota, ia ae maua foi le ola ma le malosi o lena itu.

Ia lau afioga i le Fofoga Fetalai, manatu e le umi se faamatalaga a lena itumalo, e pau o lea e fia faaleo ia si o matou faafetai. E faafetai i le tamaitai Minisita, Minisita Lagolago ia le Pulega o le Matagaluega ma le

aufaigaluega, ia tainane foi ia le Komiti o Tupe, le Taitaifono, Sui Taitaifono ma le Komiti, e tusa ai foi ma le galuega fita sa feagai ma i latou. E momoli atu ai le agaga faafetai o lenei itumalo, ma ua faigofie ai ona faapea atu lou nei sui usufono, ua matou lagolagoina le Tala Faatatau o le Tupe Faaopoopo (Nu.1) 2021/2022. Faamalo faafetai.

E tele nisi mataupu lau Afioga sa faapena ona faamauina ae o le a le oo i ai se faamatalaga, o lea sa faalogologo o lea sa laga e le tele o sui usufono. Ae pau o lea, e fia afea e lou nei sui usufono ona e fia malamalama atili i le tulaga lea o le \$250,000 mo komiti o itumalo taitasi.

Lau Afioga i le Fofoga Fetalai sa faalogologo i le tatou Fono anaeila ina ua saunoa le Afioga i le Minisita o Faatoaga ma faapea mai, o lo o talia le toe taliu mai o le faigamalaga a le Taitaifono po o le Minisita o lo o fitoitonu ai lea poloketi. O le fesili lau Afioga ona o lea e matau atu toe 5 masina o lenei Tala Faatatau o le Tupe i lenei tausaga. Po o le a se fuafuaga la e i ai pe a faapea e toe tolopo le faigamalaga a le Afioga i le Taitaifono. E pei o tulaga ia e fia malamalama ai ona o le puupuu o le tatou taimi, a o lo o fia galulue itumalo. O si o matou itumalo o se itumalo ua masani i le fai o talosaga ma fai ai poloketi. Lau Afioga ina ua faavae pei ona taua foi i le tatou Tala Autu o le Tupe, ia na faavae le komiti a lenei itumalo i le 2017, ia o lo o i ai foi le fuafuaga o le taiala ua maea ona faataatia mai lava i lenei taimi seia oo mai i le tausaga ua tea, e feoloolo lava nai polokalame po o poloketi sa mafai ona faataunuina.

E pau lava le eseese i le taimi lenei ma le taimi lenei, o le taimi lenei sa ave le talosaga i le Matagaluega, ae saili e le Matagaluega se fesoasoani e faatino ai le poloketi o lo o fia fai. A o le taimi lenei, o le manaia o le taimi lenei, o lea ua i ai le tupe, le \$215,000 lea e faatino ai, e talosaga atu ai le Komiti lea ona faamatuu mai lea e faatino ai latou galuega. O lea e momoli atu ai le faafetai i le tatou polokalame lea. Na pau lava le popolega ua vave le taimi lau Afioga, ia ne i toso toso atu le faaogaina lea tupe, ona toe tilotilo lea po o le a se isi mea o le a fai, ia o le tapena atu foi mo le tausaga fou. Aua e talitonu o la e ua uma ona tapena le Tala o le Tupe mo le Tala o le Tupe i le tausaga fou.

E i ai foi la le tuualalo e fia avatu i le vaega lea, e pei ona taua foi e le sui usufono o lea faatoa maea atu lana saunoaga, e momoli atu ai le agaga faafetai o lea ua toe foi mai le tupe lea e faatino e fesoasoani i nai tagata o lo o moomia le fesoasoani i lalo o le CSOs lea, le \$4 miliona. Ia pei o le popolega lava lea e tasi lau Afioga aua pei o le tupe lava lea e \$4 miliona e masani mo le 12 masina, a o le taimi la lea ua tuu mai ai, o lea ua toe 5 foi masina lea e totoe. E talitonu a lelei le faatinoga, e tele aiga o le a faapena ona talia o latou manaoga i le manaomia lea o le fesoasoani i le toso lea o le eletise ma le toso atu foi lea o le suavai.

E i ai la si au tuualalo e fia avatu i lenei itu i lau Afioga i le Minisita, e a pe a... o se fesoasoani ae vaevae mai foi le seleni lea i lalo o komiti ia o itumalo

taitasi. Lau Afioga a vaevae i itumalo taitasi le \$4 miliona lea, e pei lava e \$79,000 o le a faapena ona faaagaaga i le komiti lea latou te faia le galuega. E pei ona silafia e le Maota a o faafogafoga mai foi itumalo ma Samoa, o komiti ia o lea o le a totogi, o le a maua foi a latou alauni, ae le o se isi vaega lea e mafai ai ona faaoga le komiti lea, aua o latou ia, o la e malamalama lelei i o latou nuu ma afioaga aemaise le itumalo, aemaise foi tagata o lo o moomia tonu le fesoasoani. E pei o se tuualalo lea ia fai ai le galuega a le komiti aumai lea o le talosaga a le aiga avatu le recommendation a le komiti ae fai le faaiuga tatau a le Matagaluega ma le afioga i le Minisita pe faatino e talia pe leai. Ia, pei o se vaega lenei sa fia avatu ai se tuualalo.

Ia, e fia momoli atu foi le faafetai i lau Afioga i le Minisita o Galuega, faafetai o lea ua amata le galuega o le faaleleia, le maintenance o le auala lea i totonu o lou itumalo, o le auala lea o le Fuaiupolu Road, lea e agai i le Falefitu Primary ma le Kolisi o Vaimauga. Faamalo faafetai. Ia o lea e tapena atu i le ae o aoga. Pau lava o lea sa ou asiasi ai ananafi i le afiafi matou talanoa ma si vaega, na ou faapea o le tatou... lea o le a seal, ae o lea e fai mai o le cheap seal lea o le a seal ai. Ae manatua foi o totonu o lenei itumalo, e pei e main road uma lava magaala ia, aemaise lava le taimi e ae ai aoga. O le tele o le mamalu o le atunuu e faapena ona agai mai totonu o le itumalo lea. E pei ona silafia o lo o i ai le Kolisi o Samoa, ae le gata i lea o le iunivesite aoao o le tatou atunuu. Ia, pei o tulaga ia, e manaomia lava le faaleleia o auala ia aua e faaoga lava i taimi uma e le tatou atunuu.

Ae tasi foi si au talosaga e fia tuu atu i ou autafa, ae faafetai o lea sa e saunoa mai ananei i le tatou malologa, o lea ua i ai le fuafuaga o lea o le a settle foi le auala lea i i le alu atu lea i le Loto Samasoni e fesootea ma le agai lea i Faatoia. Faamalo faafetai o le a faatino foi lenei faamoemoe, aua o auala ia e manaomia ai le faaoga, ia o le taimi foi lava e ae ai aoaoga. Faamalo faafetai.

Ia ma le talosaga mulimuli i lau Afioga, ona o lo o i ai tapenaga a si o matou nuu i Moataa i tai i le faleaoga i le mea lea e i ai le malae, e fai lava ina faaletonu o le auala, pe o i ai le tatou maintenance team pe mafai ona o atu se i tagai i ai ma faalelei ai lea vaega ona o lo o i ai le faamoemoe, o se taimi lata mai o le a faapena ona tatala ai foi le faleaoga o si o matou nuu.

Lau Afioga i le Fofoga Fetalai, e manatu e pau lea. Faafetai i lau Afioga e tusa ai ma le avanoa, a o le tatalo a lenei itumalo, ia agalelei le Atua i lau Afioga, maua pea le soifua laulelei aua le faafoeina o le Fonousu a Samoa.

Agalelei i le Tamaitai Palemia, le Sui Palemia ma le nofo a Minisita o le Kapeneta, agalelei foi i le Sui Fofoga Fetalai ma le nofo a Minisita Lagolago.

Ia liliu mai foi i lenei itu, agalelei mai foi i le Taitai o lo o tapuai mai ma faalogologo mai foi i le tatou Fonotaga, maua foi sona malosi, agalelei le Atua ia i ai Lona aao faamalolo ia te ia. Agalelei i le Sui Taitai ma lenei Itu, maua ni manatu aua foi le tuualalo i le tatou Malo mo le agai i luma ma se manuia mo Samoa.

Agalelei i le Susuga i le Failautusi, le Sui Failautusi ma le tatou Ofisa o le Fono Aoa. Agalelei foi i Ofisa Sili o Pulega, Sui Sinia o Matagaluega ma Faalapotopotoga, maua pea le malosi maua le tomai aua le faatinoina o galuega mo le manuia o le tatou atunuu.

Ia, ae muliai se faamanuia i si ou tina o lo o tapuai mai i le fale, le tina ia Fouai, ia agalelei le Atua ia i ai foi Lana faamalologa i luga ia te oe, maua pea le malosi e maua ai pea se tatou mafutaga i lenei tausaga. Ia mania taualumaga o lo o totoe o le tatou fonotaga. Soifua.

**FOFOGA FETALAI:** Ia, ua faamalo saunoa i lau Afioga i le sui usufono mamalu mai Vaimauga 2. E talitonu lava e puupuu lava le saunoaga ae anoa aua foi nai mataupu aua le lumanai manuia o si ou itumalo, aemaise foi o lou lagolago i le tatou Tala Faataau Faaopopo o le Tupe. O le mea lea, malo faafetai, o lea lava ua maua lou agaga o lo o lagolago lava i mea uma. O le mea lea, ia faafetai. O lea foi ua faamauina lau faanoi mo le aso a taeao, ia ua talia foi e le Nofoa. O le mea lea, ia malo faafetai mo galuega o lenei aso.

Ia, a o se avanoa lenei mo se tasi foi o sui usufono. Ia o lea ua matau atu o lea ua fou mai le sa o le Vaimauga 1, lau Afioga Sulamanaia, Fetiaia Tauiiili Tuivasa. Le avanoa lenei o lau Afioga i le sui usufono mamalu.

**Afioga SULAMANAIA FETAIAI TAUIIILI TUIVASA (Vaimauga 1):** Ou te masalo o le itumalo lenei o Vaimauga e tumu i le fealofani. Sa manatu lava e tomuli maua ma Vaimauga lauga o le Maota lenei, ona o eleee sa nei o le Vaimauga. Ae ui i lea, o le a sosoo lava le Vaimauga ona e fealofani.

Ou te manatua lava i lou loto le falefesiitai po o le faletalatala o le teine o Sina ma lona tuagane o Tuisavalalo. O le tasi aaso ua faataunuu lea faletalatala i le fale o le teine, o le tasi aso ua faataunuu i le fale o le teine. Ona faaaau ai lava lea o le falefesiitai po o le faletalatala. Fai mai o le tasi aso a o faaaau pea lea faletalatala, na fai atu ai le teine i lona tuagane, paga lenei aso ua ese. Fai mai le tama, ua ese o le a? Vaai foi oe i le lagi ua maninoa le lagi, ua soloitua ao i gagaae, ua tafitoelaua ao i gagaifo ua matagi sauoo le aso. Lau Afioga i le Fofoga Fetalai, o le ala lea o le matagi sauoo o le Maota Fono lenei o Samoa. E mafua i se a? O le tofa paia ma le faautaga oo lea ua aofaga potopoto i le malaefono nei po o le Maota Fono nei. E momoli ai le agaga faafetai o lenei itumalo.

A o le i faia se sao e muamua ona faatalofa atu ma ofo alofa atu e faamanuia atu le tausaga fou e lenei itumalo i lona talaga atoa, i le afio o lau Afioga i le Tamaitai Palemia, lau Afioga i le Sao Faapito lau Afioga Fiamē Naomi Mataafa. Afio foi le Afioga i le Sui Palemia lau Afioga Tuala Ponifasio. Afio Afio Afioga i alii ma tamaitai Minisita o le Kapeneta, ae a Minisita Lagolago.



Liliu mai i lenei itu, e faatalofa atu e ui lava e le o afio mai le Taitai o lenei Vaega ae masalo o lo o taputapu mai. Faamanuia atu ma ofo alofa atu i le Afioga i le Taitai o le Itu Agai lau Afioga Tuilaepa Dr. Sailele Malielegaoi. E faatalofa foi i le Sui Taitai aemaise o sui usufono o le Maota Fono o Samoa aemaise e faatalofa atu ma ofo alofa atu ma faamanuia atu le tausaga fou e lenei itumalo i lau Afioga i le Fofoga Fetalai aemaise foi le Sui Fofoga Fetalai. Malo le galulue, malo le tatalo. I lenei vaitau ma le tatou Paeaiga Lona XVII, ua tofofi tatou e le Atua e ala i filifiliga a o tatou itumalo. Viia le Atua.

E le mafai foi ona alu le lauga a le Vaimauga e le i faafeiloai atu, talofa e, lele lava ua goto le fetu a o lea lava e taputapu Ofisa Sili o Pulega o Matagaluega a le Malo, ae a Faalapotopota Tumaoti? O outou lea e tua i ai le Maota lenei e ala i le Kapeneta i faaiuga fai. O outou mama na, aua le tuua le fautua. O le mea lenei na ave ai outou e le Malo i atunuu mamao ina ia outou omai e fesoasoani i le tamaoiga ma le fautuaina o le Kapeneta ma le faigamalo.

E manatua lava le tapuaiga a Le Ao Mamalu o le Malo, le Afioga i le Tuiaana Tuimalealiifano ma le Masiifo. E faapena foi ona faatalofa atu ma ofo alofa atu i le tapuaiga a le Sui o le Fono a Sui Tofia le Afioga ia Le Mamea Ropati aemaise foi le Masiifo.

Ae a le tapuaiga a le Faamasino Sili aemaise le Peresetene o le Faamasinoga aemaise alii ma tamaitai Faamasino o Faamasinoga e lua.

Ia, le tapuaiga a Samoa, talofa e, ia tapuai maia ma le manuia. E le mafai foi ona alulua le lauga a lenei itumalo e le i afea lava le aufaigaluega paia a le Atua o lo o nonomanu i le ao ma le po, tatalo ma tootutuli aua se manuia o Samoa ma ona tagata, e le gata i Samoa nei a o atunuu e mamao. Ia faamalo tatalo, faamalo le tapuai, a o alofaiva le Palemene i ana fonotaga.

E faai ai sa matou faamatalaga i si ou itumalo pele o Vaimauga Sasae po o Vaimauga 1 lea ua i ai nei, mai lava i Fusi ma Fanuatanu, Puumulivai, Puafasa i le tuaoi o le faletuamasaga ma Atua, ia, aua le afio o le Afioga ia Leniu ma ona alo. Afio foi le matua ia Taliulu, ae a le faaululuga o Salevalasi ma le paia o le Aiga Salevalasi, ae a lau fetalaiga Fuatimau ma ituala e fia ma oe Tuisamau.

E faatalofa foi i si ou nuu o Letogo aua le malae i Lalotea o le malae o le faautugatagi a Tumua e afio ai Tuliaupupu o le Fofoga o le Alataua, le Usoalii matua o le Teialii, alo o le Malietoa, alo o Tuliaupupu, ae a lau fetalaiga Mauletaua ma le nofo a ituaiga ma Tuisamau.

Talofa e i le tapuaiga a si ou nuu o Vailele, aua Niniva ma Punialavaa, le Falefia o Alii aemaise le gataiala le Maopu aemaise Tupuanai ma Lefau ma le mamalu ia Saleupolu.

Ae a a le tapuaiga a si ou nuu o Fagalii, aua Pilioua ma Fatitolo, Falepouiva aua le paia i alaalatama Tuisugaletau Luamanuvae ma le Gafa, aemaie lau fetalaiga Pulemagafa, oulua e toalua Puna ma Leatitagaloa, le nofo a ituaiga

ma oe Saleupolu. Ia tapuai maia ma le manuia, se i fai se sao o le tatou itumalo ma ofo alofa atu le tatou itumalo. O le lauga muamua lenei a le tatou itumalo i le falefono lenei o Samoa aua le Paeaiga Lona XVII. A o le i alu le lauga, o lea ua maua le faamatalaga o lo o lagia Niniva ma Punialavaa i si tina matua ia Sina le faletua o Pese, ia maua le faamafanafanaga ia te oe le tama aemaise le nofo a alo po o lau fetalaiga Satia. Ia maua le lototele aua le toesea o le tina i lenei vaitau.

E muamua lava ona oo se manatu o lenei itumalo i manaoga. Lau Afioga i le Minisita o le Siosiomaga, e momoli atu le agaga faafetai i le tofiaina o oe. O le sao ia o le tofiga a le Afioga i le Tamaitai Palemia, o oe le isi tamalii sa tele foi tupe a le tatou atunuu sa avatu ai i fafo, ia o lea ua foi mai ma galue ai, o lea foi ua tofi i le Afioga i le Minisita, ia o ou mama na. O le Paeaiga ua tuanai sa pasia ai le taligalu o le afioaga lea o Laulii, ma Safata lea e nofo mai ai le alii lea. Ae o le taligalu lea a Laulii mo lou silafia i le afioaga lea o Laulii, e muafale i le moana ae tuafale i le papa. Pau lava lea o le nuu o le itumalo lenei e leai se aau o le ava. A e silasila atu ma e afio atu, toetiiti lava fafati i tuamaota. Ia o lea e avatu ai le talosaga pe faaauau lea faamoemoe sa pasia i le Paeaiga ua tuanai le taligalu lea o Laulii, e pei ona ou fai atu o le taligalu lea e leai se aau, o galu tetele la lea e i ai, ia talofa e, ai lava o le alofa o le Atua i tatalo a lenei itumalo. E le gata la i taligalu, a o le vai. E pa mai le vai, e faapena. Ia se i silasila ane i vaitafe o le pitonuu mai lea ou te talanoa atu ai ma le taligalu atoa. E faapena foi i taligalu o le afioaga o Letogo. Ia ua aia lava na faamoemoe sau i Vailele. O le itumalo lenei o Vaimauga e i ai talatuu o le atunuu, o le maualalo ia o nofoaga e afifio ma aumau ai nuu nei o Letogo, Vailele, Fagalii aemaise o Laulii. E lelei la nuu ia e mafai ona o i luga, a o Laulii e leai. E sola atu i uta e le mafai ona ae i luga, talu ona tulai mai e le i au ni auala galue i luga o mauga. Ia o le ala lena e tuuina atu ai i ou autafa. A e afio atu i le itu lea o matou i si ou nuu lea o Fagalii, la e i ai le fale manaia lava lena e i autafa o le vai, ua leva ona ou alu e talosaga i lou ofisa se faatagaga e tanu ai le mea lena ua aia. Ia e oo mai lava i le taimi lenei e leai se tali, ae o la e la ua fai lava le fale. Ia ou fai atu, ia talofa e, lona uiga e atoa ifo le tausaga ua toe aia atu le mea. Ia se i silasila ane lau Afioga i Fagalii lea ou te fai atu ai.

Lua o Fagalii lava i le pito mai i le auala laupapa pito mai, sa fai lava e le CSSP le poloketi lea na fai lava e matou, na tagi lava i lima. Ua sau le galu ua faapena ona...A o lalo lava o nuu ia ou te fai atu ai i Letogo ma Fagalii, e i ai tulaga maota ma laoa, ia e le i taitai lava ona matou tuua mea sa feola ma... o talatuu, o maota ma laoa o le ala lea e tatalo atu ai. O nuu nei o itumalo nei e i ai vaitumaoti ma vai a le Malo, se i e fesoasoani mai i nai laau e toto i autafa o vaitafe. O le tele o le tulaga, aemaise lava le nuu lea o Letogo ma Vailele o loo sau ai le vaitumaoti. Ia o le tele o nisi ua tata, aemaise o le eleele i lalo i le Samoa Land, pe le mafai ona toe fai se tulaga foi lea i laau toto aua le sefeina o tulaga na faapena.

Ia ua ou oo mai i le Afioga i le Minisita o Fesootaiga. Ia, o oe le isi tamalii na iloga foi lou tulai mai i tupe a le Malo na faaoga ai ma avatu ai outou i fafo ma sa e galue foi i le Ofisa Sili o Pulega. Ia e vaai lava ma le totoa i le news i Tonga, ananei i le taeao ma sau ai ua leai se fesootaiga i Tonga, ona o le a? Ua motu le cable lea e alu ai fesootaiga i lalo o le sami. Ia o le tuualalo, i le Paeaiga ua tuanai, ou te le iloa po o toe i ai se satellite. A o le agaga lena aua a fai foi se satellite a Tonga ou te le iloa. O le Paeaiga ua tuanai, o le tele ia o le mau cable toetiiti lava oso le isi cable i luga o le isi cable. A ou te le i faalogo lava pei ua faatuatuanai le satellite. E momoli ai le agaga faafetai o lea ua ou faalogo ua toe afio mai lau Afioga toe faaauau satellite ia. O le aoga ia, aemaise lava taimi faapea e tua i ai si tatou atunuu. A o le tulaga foi i le nuu lea o Laulii i le pou lea na ou fai atu ai, e leai ma se maua i le TV, ona o Laulii e mauga, e le oo atu i ai, pe mafai ona fai se pou i le va o Letogo ma Laulii e oo atu ai lena faamanuiaga.

Ou oo mai i le Afioga i le Minisita o Aoga, talofa e, o le sao ia o le filifiliga ua leva ona e galue ai, o lea foi ua e toe oo atu i totonu, viia le Atua. O le vaiaso lea e ae ai le NUS. Tele o faafitauli i le le gafatia o pili o nai fanau. O le tatalo, se faamama avega mo lena vaega. Pe togitogi lava a ia delay agai i tua, tele o nai matua lima vaivai ae faapena le tatalo a lenei itumalo i lau Afioga i le Minisita o Aoga, se i silasila ane i le vaiaso fou mo pili o le aoga NUS lea ou te talanoa atu ai.

O le tulaga i asiasi aoga. Ia o le lelei ia o lena faamoemoe sa i ai. E tatalo atu pe le mafai ona toe faaopoopo nisi asiasi aoga, aua o le tele o aoga tulaga lua, e pei e tau loa o le a alu atu le asiasi aoga, e tele lava ina faapena, e pei e faapena. E seasea lava asiasi le ofisa le main office i nuu i tua ae pei o le asiasi aoga lava ia, e pei o lana ia matafaoi lea, se i toe silasila ane pe le mafai ona toe faaopoopo nisi asiasi aoga aemaise foi le soifua galulue o nai faiaoga. E vaai lava ma le totoa i mea o faiaoga, e sioti, ae o le tatalo a lenei itumalo, ia pe le mafai ona e silasila ane, ua lava lou silafia.

Na ou vaai i le lipoti faaletausaga a le Matagaluga lea ua taulimaina nei e le Maota i le aofaiga lava o tamaiti a le Malo, e 62,519 tamaiti i le 2021. E 45,489 le tulagalua, ae 17,030 le vaega lea o aoga maualuluga. O lona uiga la, ae le i i ai i totonu aoga tumaoti ma private schools. A tuu la i ai ma private schools pe 17,000+ lona uiga e talanoa mai i le 79,000 tamaiti aoga. Ae fia faiaoga ia e aoaoina? Lea e sau i le lipoti e 1,704. O lona uiga na o le 1,704. O le uiga la o le tatalo a lenei itumalo i lau Afioga i le Minisita e ala atu i lau Afioga i le Fofoga Fetalai, pe le mafai ona i ai ni faatosina i mea o faiaoga ina ia mafai ona faatuputupulaia ai pea le naunau. Ia aua o lea ua tau atu le numera lena, 79,000 ae 1,700 le mea lea ua i ai i le 2020 lena, ae ese ai nisi o la e ua o i mea foi nei o galuga faavaitaimi, o isi foi ua hire atu e Toelau ma Tutuila. O lona uiga e le o toe maua lea numera. Ae tuu atu i ina i ou autafa ni faatosina e ala i ni tulaga faapena ni incentives e tuu i tamaiti aoga po o faiaoga, ia pe tuu foi le retire o faiaoga i luga i le 70 ina ia faaauau

ai pea le fiafia e galulue, a ia mafai lava ona avatu le pepa a le fomai o lo o lava aemaise o lea ua amata tatou aoga amata e faaaoga i ai nai tina ma nai tama matutua iinei i aoga amata. E pei o le isi e matua lava le soifua, e pei foi o lau Afioga, a o lena lava e te talavou, o lena lava e i ai lou malosi. O le tuualalo lena a lenei itumalo i lau Afioga i le Ofias o Aoga.

O le Ofisa o Faamasinoga, ia, e momoli le agaga faafetai. E le faigofie lou valaauina ae o le tatalo a lenei itumalo i le Ofisa o Faamasinoga, ia pei e lilifa lava faamanuiaga i le Ofisa o Faamasinoga i luga i le itu papalagi foi lena e o i ai faamasino na, a o nai faamasino Samoa e faatuatuai lava. Ia o le tatalo a lenei itumalo, silasila i ai i nai faamanuiaga, ave i ai nai taavale foi na ina ia maua ai lava e latou le naunau ai lava e fai le galuega. Aua o lata ita lena vaai, e pei e faatuatuanai lava nai faamasino Samoa, a o faamanuiaga uma e ave lava i luga i le tulaga i luga i le faamasinoga, e seasea o i ai nisi, a o tatou e o lava i lalo.

O le Matagaluega o Tina ma Tamaitai e ui e le o afio mai le Minisita, ae o le vai tumaoti pei ona taua foi e le isi sui usufono, o le itumalo lenei e tele faamanuiaga i suavai. O Letogo la ma Lauili o lo o inu i le vai tumaoti. Ia ou te le o iloa po o ai lea e suia le Minisita lea o Tina ma Tamaitai, ae se i silasila ane i vai tumaoti. O le uiga o lau tala, o le soifua mama ia ma le tausia o le soifua maloloina o le atunuu o lo o i ai. Ua uma foi ona ou talanoa i nai ou nuu ia, se omaia tatou o i le vai a le Malo o lo o mama. O le latou tala, e matua taugata e le gafatia. Ou fai atu, o le mea la lena e tupu, tatou te inu palapala ai lava aua e pa loa oso i totonu. Ia se i silasila ane po o le Matagaluega o Tina ma Tamaitai i le vai lea, o lena e tuu mai lau Afioga i le Minisita Lagolago ia po o le Matagaluega o le Falemai. Silasila ane i le tulaga lena i le vai tumaoti.

Aemaise o le isi o vaega o le faalupega. O le Matagaluega lea o Tina ma Tamaitai, o le tele ia o nuu ua vaeluaina ai. E pei ua pule atu le Matagaluega aumai ia faalupega. Ae leai lava ma se feau a le Matagaluega i faalupega o nuu ma afioaga, e pule lava latou, ae pei ua avea le faatauanau a le Matagaluega ua topelau mai ai nisi mea faapena. Se i silasila ane i faalupega o afioaga ma mea faapena, e tele foi faamasinoga ma mea faapena e tutupu ona e mafua atu i mea o faalupega. O mea ia o Tulafono foi nei by-laws a alii ma faipule, pe le toe silasila ai le Matagaluega o Tina ma Tamaitai, ia o isi lava by-laws foi nei pei o le agaga sa fai ai ina ia aoga i tai i le faamasinoga, ae se i silasila ane i lena vaega i le aiatatau lava ia a alii ma faipule ia e aumai ai ni latou Tulafono e resitala i totonu o le tou Matagaluega ma ave ai se kopi i tai i le Ofisa o Faamasinoga.

O le Matagaluega o Leoleo, ia na o le agaga faafetai lava i le Minisita o le Vaimauga, e leai lava se mea o gase. E vaai lava i le auunaga a lenei Matagaluega e tele lava ina lauga ai lenei itumalo. O le Matagaluega lenei, o tamalii foi ma tupu sa i ai foi i taimi ua tuanai, sa leai lava ni auupega, leai ni fana ma ni mea faapena, sa avea lava le fofoga e fai ai tulaga po o a ni

osofaiga i lena vaitaimi a o tulai foi lou tuua e taitai ai ma nai tama matutua. Faafetai i lenei Paeaiga ua tulai mai. O le tatalo lava ia a lenei itumalo, ia se i silasila i le auaunaga i le atunuu, aemaise o le vaaiga o tagata i le taimi e tutupu ai faalavelave.

Ia, o le Matagaluega o le Soifua Maloloina, talofa e. A ou vaai atu i lena itu, e pei lava oe o se papalagi sole. Oka oka e lou aulelei, ia ua atili ai ua tofi oe i le Minisita o le Falemai, ia viia le Atua. O le Matagaluega lena a oe o lo o tatalo i ai si o tatou atunuu, o lo o nonomanu i le Atua aua ne i oo mai le faamai, ia o ou mama na. O le tele o mea o lo o tutupu, ia o lea lava e luitau tatou e le Atua, e ala i le a? Tapenapena e i ai lava le taimi. O le atunuu lenei o Samoa ua uma ona faamanuia i ai le Atua. O le taimi lava na fai ai e o tatou tuua le Faavae o Samoa e faavae i le Atua, e le i tuua i totonu, faatoa tuu lava i le Paeaiga lea na uma nei. Na uma loa ona tuu i totonu o le Faavae sa i fafo o le faavaa, pei o le mea lena lea ua uma ai isi sui usufono na ona omai lava e tuu i totonu le Faavae le toe omai loa. Ia ae fai atu ai.

Lau Afioga, o le border lava esili ona popole i ai le sui usufono lenei, ona o i lea... po o le a le tatala o mea i totonu o si o tatou atunuu, e le o i ai lava se isi o mai. I lau ia faamalosiua ma lau tuualalo i lau Afioga, ia, se i tautuana le border, o oe lava o lo o i ai le ki ma le tatala, aemaise talofa e i e o lo o faataiulu aemaise si tama o Agafili, aemaise foi o le matai Fagalii ia Samau o ia lea o lo o mafai ona tu i luma ma lana Matagaluega, ia o outou mama na.

O le tulaga lea ua maua tala o le a totogi e auina mai fafo. O le tuualalo a lenei itumalo, tasi lea popolega la ua i ai tagata, ae tuu atu pea i autafa o lau Afioga ma le Kapeneta, e tele tupe ua alu ai ona sa faamoemoe faapea e short period, a o lea e... masalo po o le alu atuga lava lenei.

Ia e a pe a fai se tauofoga? E tele faletalimalo ia e avanoa, aemaise foi o aiga o lo o avanoa maota ma laoa. Ae tuu ai faapea e \$50 i le po, ona o lea ua maua e omai pay e latou. Na ou faalogo i talanoaga a le Taitaifono o le vaega lea, pe o se tupe e totogi e le tagata lea e sau mai atunuu mamao i fale ia e nofo mau ai pe a faapea e \$5,000 ae o tagata la e omai fafo e le oo i se \$5,000 se tupe la e sau ma ia. A fai la faapena, ia talofa e, o le isi tuualalo... O le uiga o lau tala, ia laugatasia uma. Ia fialia ai tagata e omai, ia e \$50 ae pule lava oe pe totogi e oe lau taumafataga. Ae o se mea e fai se tauofoga o ai le hotel po o se faletalimalo e ofa mai faapena ona omai lava lea o i ai. Na o se faataitaiga faapena ina ia faigofie i o tatou tagata, aua e le omai ma ni tupe. Aemaise foi o vaega na siimai, ua toe fia taliu mai, o fea e aumai ai tupe. E toe tigaina foi i tatou lea e iinei. O le tuualalo, se i silasila ane lau Afioga i le Minisita aemaise le Kapeneta mo se mea faapena, ina ia mafai ona laugatasia uma ai o tatou tagata.

E i ai si tina matua lava o si o matou nuu, e alu lava ma lana penisione e aumai ana fualaau. Ona sau lea aumai i le sui usufono, fai mai o la e sioki lava fualaau, ia sau loa le sui usufono faatau atu i Apia a na fualaau. O le

tulaga lena. Ia tautuana aua ne i sioki tatou fualaau. Lau afioga i le Minisita, ia silasila ane i lena vaega.

O le Labour. Talofa e, o lena ua e tulai mai lau Afioga i le Minisita e ala atu i le Fofoga Fetalai, Leatinuu, o ou mama na. O lou sailimalo lena ua tele faamanuiaga na ua ia te oe. O le tuualalo a lou uso sui usufono sa tatou lenei itu, o ou mama na. O lau Matagaluega lenei o le Labour, se i silasila ane lava i le Reserve List, o le tatou faamoemoega atoa lena o si o tatou atunuu e ala i faleoloa laiti, e ala i transport operator, e ala i taavale, felauaiga, e ala foi i taavale hire po o car rentals. Se i silasila ane, o le tele o isi faleoloa, se i tulou lava nai Saina ia Samoa, ta te alu atu ua i ai nai tagata faapena, a o faleoloa laiti, it's a general store, e tuu mai ai i totonu le Saina. A o mea na o lea e reserve mo tatou lava tagata. E faapena, se i silasila ane i le Reserve List po o ua... Price Control o ou mama na, faamalosia lea vaega, o lena lava e i ai i totonu. O le toatele lava o nisi na na lauga mai o lena Itu, fai mai se... a o la e i ai lava. Se i toe faamalosia ifo le Price Control lena, a o lea na toe faaoso i le taimi o le Koviti-19, ona o le taumafai o le Faigamalo foi ua tuanai, e tauva, po o ai e pito i lalo, ma faatuutuulaia i lalo le tulaga o lana price, ia o ou mama na, silasila ifo, aemaise foi o a na oloa expire, se i vaai ane. Ou te alu atu i isi faleoloa, o le tau o le M&M e \$4, ae fai mai, a 4 au mm ua \$7, ae tago atu, ua expire. Ua taumafai e faapena, ia se i silasila ane i le vaega lena.

O galuega faavaitaimi, talofa e, e le faigofie le naunau o alo ma fanau e o i fafo. E pau lava lau tuualalo, tatou te tatalo pea i le Atua aua pau lea o le faamoemoe o lea e faaauau lava, o lo o tua i ai o tatou aiga. A o lou ita ia ina ua sau le faamoemoe e o atu loa o tatou tagata o loa i tua i Niu Sila, e pei ua fiafia tagata, ae ua matua ou ita lava. Ona o le a? e na o le o atu lava o loa feiloai loa ma le faamai. Se i toe silasila ane, pe mafai ona o atu, pe tasi lava le vaiaso. Aua e o atu loa, taumafai loa farmers ia, e o atu loa e o faigaluega ae se i faamasani. Aemaise lava tagata ia e faatoa o muamua se i faamasani i le ea. Aua o le isi e o atu loa taia loa i le malulu, tale loa amata ona sau ai faapena le faamai. Aemaise lava i le vaega i Ausetalia, se i silasila ane i ai lau Afioga i le Minisita.

Ona mulimuli atu lea e mea lava nei o fanua o si ou itumalo. E leaga foi se tagata ae tautala soo. E mai lava i le Paeaiga e oo mai i lenei Paeaiga, o le naunau lava i ou fanua. Silaila ane lau afioga, ua uma foi ona tatou feiloai. O le Paeaiga ua tuanai, na ou tatalo ai i le Faigamalo ua tuanai, ia \$35,000 i le \$8,000, a o lea ua ou tatalo atu o oe o le uso lava e gata ai uso. Aua le toe faia se tupe ae aumai fua loa. O matou lava eleele ua leva ona i ai, ae na o ese loa Siamani, ave e le Uesetete, o ese le Uesetete, ae aumai i totonu o le Samoa Land, a o lea e olo lava le fua. Ae tautuana lau afioga, e faapena se tuualalo i lau afioga.

O le Minisita Sinia lea, o le tama ua masani i le Itu Agai. Minisita o le LTA po o Felauaiga Tetele. O le ta auala i Fagalii uta, manaia lau saunoaga, aua

le naunau i ni aualagalua. O Fagalii uta, e o lava i uta aiga. O le matua malepe lava o le alu i uta. E mafua i se a? E o atu lau Matagaluega la e i ai le vai e sau mai uta i le faatanoa, o atu loa le aufaigaluega, tatala le vai. Ua sau ai loa le vai, o lea e pei e tatala e faaalu le ea...a o totonu ua matua malepe lava. Se i oo i lenei vaiaso fai se ta avanoa ta tietie i ai, se i vaai ifo i le auala lea i Fagalii uta. O le tulaga foi i le auala, a e oo atu i Fagalii e i ai le malae tapolo. O le pito la i o o Fagalii e i ai le auala e o ai i uta taavale. Aua e leai se auala e sau i totonu, o le auala taavale lea ou te talanoa ai, ua matua malepe lava. E mai lava i le tele o taimi. Sei silasila ifo lau Afioga i le Minisita, e ala atu i le Afioga i le Fofoga Fetalai. E faigofie ai ona sosola si o matou nuu i uta i le tsunami, pe a fai le auala lea e sosolo atu lava i le malae tapolo e agai ai i uta.

E faapena foi i auala taloto i totonu o Vailele, e te taamilo ai i le nuu e faapena se lagona e tuu atu i ou autafa. E faapena foi i Letogo o le mea lava lena e tasi, o totonu o si o matou nuu i auala taloto ua matua malepe a le tulaga o lo o i ai.

O fanua faatau ia i le matou nuu. O le nuu lenei e pei ona ou fai atu, ua ave uma fanua, ua faatau motu foi luga o le mauga i le va o Laulii ma Letogo, ua i ai nai tagata na e nonofo mai, ua uma foi ona o atu ia te au, fai mai ua pasia faale-Malo le auala lena e o ai i luga i le mea la sa fai e le tamaloa lena e ona le helicopter. Ia faafetai lava i lenei nuu, e leai ma se o e tutuliese nei tagata, o lea ua umia o matou fanua. Ae silasila ifo lau Afioga i le Minisita alofa, i nai tagata ia e nofoia eleele o lenei itumalo i se auala e o ai faapena.

O Matavai, e pei ona ou fai atu, se i silasila ane lau Afioga, i le vai o Mapuifagalele. O i ina o lo o i ai Tamaitai Sa, pe le mafai ona faainu fua ia Mapuifagalele, o tina ma tama matutua o le atunuu, e le faailoga lanu foi lenei ekalesia. O lo o i ai i totonu o lenei itumalo nai tina matutua ia, aemaise o nai taupou sa, ma le sui usufono e tagi i le ao ma le po e sue ni mea e tali ai le sua ma tausii ai...a o lenei e feofeoai tagata e ona matu....Ae tatalo atu i lau afioga, e aua ne i toe totogia se vai, o le meaalofa foi lena a lo tatou Malo i Mapuifagalele a si o tatou atunuu.

O le afioga ia Laauli, ua lauiloa foi lau Afioga i le tulaga foi i le finau i mea o le Malo. O le manaia ia o mea ua ave i ai lau faamuamua. O lea ua tatou tapena, ua aumai e le Atua le avanoa, tatou te tapena ai i mea e tutupu. O le mea lea o faatoaga. Ia faamalo faafetai. E tuu atu i ou autafa le tulaga o manupapalagi, ina ia toe aumai i fafo, ina ia toe tele ai nisi manu a lo tatou atunuu, aemaise o si o tatou itumalo. Ina ia fai pea ma fofoga taumafa, aemaise o le tulaga i le manu lea o le oti. O le taimi lava e maua ai sau oti ae tuu i lou fanua, ona e vaai lea e kiligi uma e le manu lea se i tulou, e mama uma ai. Aemaise e i ai isi tagatanuu ia e nonofo i lo tatou atunuu o si o tatou atunuu, e fiafia e taumafa le manu lea. A o atu nei la, e le mafai ona fai, ae o atu faatau atoa mai le manu lea, ona e ese foi le latou talitonuga e faatino ai a latou taumafa.

O le atinae o le totoina o le niu ma koko, o a tulaga e tulai mai, o lo o tamaoai si o tatou atunuu i fua o faaeleleaga.

O le tulaga i le Minisit o Tiute ma Lafoga. O lau Matagaluega o lo o tua i ai si o tatou Malo. E faalogologo foi ma le totoa, e le toe afea lava e lenei itumalo ia mea ua saunoa ai. Ae o le tatalo a lenei itumalo ma le tuualalo i lau Afioga i le Minsita. E faasea lava tagata i le taugata o le soifuaga, e sao lelei. Ona faasea lea faapea o le tulai mai o le tou taimi ua taugata ai le soifuaga. Ae leai, ua taugata ona o le Koviti-19 ma le sioki o vaa e aumai. O le tatalo la a le tamaloa Vaimauga, pe mafai ona e silasila ma le Faigamalo, i tiute o meaaai. Ia aveese tiute o meaaai, aumai loa i fafo meaaai, leai se tiute. E oo foi la i building materials lea e tau o sima sa fia ua fia. Pe mafai ona faaafaafa le tiute, ina ia mafai ona tuu i luga e le aufaipisinisi ia tulaga ia, se i fai foi sa latou mark up, aua e le aiaina e le tatou atunuu ia freights ma mea ia e aumai. E taumafai lava le vaa lea e aumai ai, pe fia lava ni container la e aumai, e taumafai lava e share ai le totogiina o container lea. O lea e aumai foi i faipisinisi, ae o le tuualalo lena. Ina ia silasila, o lena e oo lo outou malosi i le tuuga i lalo o vaega na, ina ia mafai ona saofaga ai si o tatou atunuu i tulaga i tiute o meaaai ma building materials ua i ai. Ae o le faamoemoe atoa i le TIMS lea e tuuina atu ai le talosaga. E lagolagoina le faatino pea, ae tuu le TIMS i ni vaega pe maua ni income a lena company pe miliona se sale. Ae o nai faleoloa laiti, e le mafaia, au ape \$10,000 ea i le tau o le masini. E faapena se manatu, ua tele le tatou alolofa i le atunuu, ia ma fai ai mea faapena, a o le popolega o lou sui usufono. Ne i alu alu le tufagatupe lea e fai, alu foi le tai \$200,000 ma mea faapena, ae oo atu ia Aperila ua toe sii le tulaga i lafoga a tagata. O le popolega lena o lou sui usufono. O le upu a le isi toeaina i lona atalii, e fia ai ia soo lava, sole, aua e te toe fia ai ia mai, ae o le a avatu le upega lea e te alu e te fagota ai. E pei e faapena se lagona o le sui usufono. Ua tele faamanuiaga e tuu mai. Ia aua ne i alu alu paulia lo tatou sa.

Lau Afioga i le Fofoga Fetalai, ua faamalo i lou tulai mai. E le faigofie lenei taimi ua e tulai mai. O le Paeaiga ua tuanai, e na o le tasi le Vaega Faaupufai. A o lenei taimi ma lenei Paeaiga XVII, o ou mama na. Ia maua sou finagalo ma faamanuia le Atua i le taitaiina o le Fonousu a le atunuu.

Lau Afioga i le Tamaitai Palemia ma lau Kapeneta, e avati le lagolago a lenei itumalo. O a mea ua outou silasila atu i lea Paeaiga sa i ai, ua lelei, faaauau. O a foi nisi mea ua outou silasila atu e le lelei, o lena ua ia outou le malosiaga, e faatino ai. Ma le talitonuga o lo o tapuaia e Samoa o tatou faivaalofilima. Ia agalelei le Atua i lenei Paeaiga.

A o le i nofo i lalo le sui usufono o le Vaimauga ona ua ou usitaia tele lau Afioga i le Fofoga Fetalai. O le tele ia o mea na ou fia talanoa ai, ae utiuti a le...e te fai mai loa ou ava.

O le Tala o le Tupe lea ou te le i oo i ai, ae e ava tele. E pau lava sina...ne i te i ua uma le lauga e le i oo i le Tala o le Tupe, e lagolagoina le Tala o le



Tupe, le Supplementary (1) lea. E faafetai i le Atua i le mea lea ua tupu i Toga. Aua a na toe tupu se isi mea faapena ia i tatou, o le a le finagalo o lena Itu. Ia tatou tatalo i le Atua, e aua ne i oo mai le faamai, aua foi ne i toe faia se isi Supplementary aua e oo mai loa mala faalenatura, o lona uiga e toe alu le isi mea lona tolu. Ae o le tatalo, e lagolagoina le Tala o le Tupe a lau Afioga i le Minisita.

E pau lava le tuualalo sa fia vaai i ai le sui usufono lenei o Vaimauga, ua tuu fua le tai \$2 miliona i le Supplementary, ae a na sau lava i le main autu e leai lava se manatu.

Ae lau Afioga ai ona o oe e te aulelei, o lea na tau teuteu mai ai le main, mataulia o le Supplementary, e pei o mea e unforeseen, o ni mea ua galo pe e le i tutupu i le mea muamua. A o lea ua aumai, ia faafetai. E ui e le o lava i le faaso a le Minisita o le LTA ma Felauaiga, ae faafetai ua faatino.

Lau Afioga i le Tamaitai Palemia, e pau lena o se sao o lenei itumalo e ala atu i le Fofoga Fetalai. O le a foi se manatu o lenei itumalo ua paopapa, ia foi mai i lenei itumalo.

A o le i faaiua le tala a lenei itumalo, o le manaia ia o le tusi lea e faauma ai lau tala. O le tusi lea a Isaia, fai mai le Isaia e 60, “Tulai ia, ina malamalama ia aua ua oo mai lou malamalama, ua alu ae foi le pupula o le Alii i ou luga.” O le manaia ia, o le uiga o lau tala, seiloga lava e te tulai, faatoa e iloa le malamalama. O lea foi e vaaia lenei Palemene, mo mea o faiga vaega o le faanoanoa ia. E oo lava i le taimi o le taumafataga e o lava lena Itu nonofo lava, ta te fiu e...ae ese lava. E leai se fealofaniga, a o tatou o Taitai o le atunuu. So o se taimi lava ou te sau ai, i le Fonousu lenei se i tulou le Maota lenei. O lou fiafia ia e look forward o le a feiloai mai i na uso. Ae ou te vaai loa i...se i tulou le Maota lenei ma lau Afioga i le Fofoga Fetalai, ou te vaai loa i tou mua ia e fai, ou ita loa. E mafua i se a? A outou vaai i le toniga lena a le Mau, e tetee ai i palalagi. Ae soona fai lava i fea na mua ua outou tulai mai i le taitaina o le Maota. O ni papalagi le Itu lenei o le a e pei e faapena se lagona. O lena ua outou tumalo, ua tumatila..

**FOFOGA FETALAI:** Ua maea le taimi o le sui usufono.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, o ou mama na. E pei ona ou fai atu, a malosi le Itu Agai, e faapena foi ona outou malosi, ae a vaivai e pei o lena. E faamalulu, a paopapa sa outou faalogologo i le sui usufono mo Vaimauga, e avatu sao lava le tala, pe lelei pe leaga toe foi mai i lenei itumalo.

Ona o le suafa o Iesu.

**FOFOGA FETALAI:** Ua faamalo faafetai mo le saunoaga a le sui usufono mamalu mai Vaimauga Nu 1. O se tasi lenei o sui e ese le manaia o le faaofiina o ona mafaufauga. E aumai malu lava ma monomono mai foi

ma mea o lo o mafaufau i ai. O le mea lea e faafetai, e eseese foi metotia o sui usufono mamalu i totonu o le Palemene. Ia faafetai, e malu lava le aumaiga, a o le taua o la ua molimoli mai ai se feau aua le itumalo. O le mea lea faafetai mo le sui usufono mo lou sao, aemaise foi o lea ua lagolagoina le Tala Faaopopo o le Tupe.

E matau atu o lea ua le toe mamao ae tatou malolo, e le o toe toatele foi ni tatou sui usufono e sausaunoa, ona tuu atu loa lea o le avanoa i le tatou Komiti ma faaauau ai le tatou galuega. Ae ua i ai le manatu o le a taatia ia se isi a tatou sui usufono e fia saunoa mo le aso a taeao. Ona o lo o i ai le faasilasilaga a le Palemia, o se taimi ona tuu atu lea i ai.

O lea ua i ai le faamoemoe, e toe sauni mai tatou sui usufono mo le aso a taeao mo le tatou Fonotaga taeao.

O lea ua tatou tulata i le taualuga o le tatou galuega o lenei aso.

Ae ou te tapa ma le faaaloalo lau Afioga i le Tamaitai Palemia mo lau faasilasilaga.

## **FAASILASILAGA A LE PALEMIA**

**Afioga Hon FIAME NAOMI MATAAFA:** Lau Afioga i le Fofoga Fetalai, ou te faamalo ma faafetai atu i le faatautaiga o le tatou galuega i lenei aso. Ou te faafetai atu foi i le usufono i le paia o lenei Palemene, aemaise o le tapuaiga mai a si o tatou atunuu, o lo o silasila ma faafofoga mai i Taualumaga o le Fonousu a Samoa.

Sa laga i saunoaga i le Maota i le taeao nei, le tulaga o le faamai o le Koviti-19, ma le taua o le puipuia malu pea o le atunuu mai lenei faamai.

I lou tulaga o le Taitaifono o le Fono mo Faalavelave Faafuasei ma Faalavelave e Tutupu Matuia. Ua ou manatu ai, ua alagatatau ona faailoa atu mo le silafia e le Palemene ma le faafofoga mai a le atunuu.

O lea ua faamautu mai e le tatou Matagaluega o le Soifua Maloloina, e tauala mai i le Komiti o Faalavelave Faafuasei, e toa 10 nisi o le pasese o le vaalele na taunuu mai ananafi mai Brisbane i Ausetalia, ua faamaonia e i ai le siana o le Koviti -19. E 73 le aofai o le pasese na malaga mai ananafi, ma e taua i le faafofoga a lenei Palemene aemaise si o tatou atunuu o lo o faafogafoga mai, e maoti ma mautu aiaiga faale-Soifua Maloloina o lo o tuuina atu e le tatou Komiti mo so o se tasi e fia malaga mai i Samoa. E aofia ai i nei aiaiga le faamaoniga ua maea ona fai tui puipuia, excavation card. O le suega e faatino i le pogaisu, PCR test. O le lipoti a le falemai faapea ma isi vaega e moomia.

O i latou uma na taunuu mai ananafi sa faamalieina aiaiga nei, seivagana ai nai tamaiti laiti, e le i agavaa e fai ni tui sa malaga mai ai. I le taunuu mai ai i le malaevaalele ananafi, sa fai uma ai suega, tests a le pasese ae le i tuuina atu i nofoaga o lo o faanfoesea ai.

Ae peitai o anapo sa maea ai ona faatino sailiga o nei suega, ma iloa ai e toa 10 i latou e positive a latou suega i le Koviti-19. O lona uiga ua aafia i latou nei i le siama. Ae peitai o le isi vaega toatele o le pasese e negative uma a latou suega.

I le taimi nei, ua faasee uma atu i latou uma nei e 10 i le nofoaga faapitoa mo le faanofoesea i Motootua, e mataituina ai. Ua maea foi ona sailia i latou sa sili ona latalata i ai i latou nei, ma e toa 9 closed contacts ua faasee i le Falemai i Faleolo e mataitu ai. E oo mai i le taimi lenei, e leai ni auga o aliai mai ia i latou uma nei.

Ua maea foi ona tofi le aufaigaluega o alii ma tamaitai fomai ma tausi soifua, e mataituina i latou ua aliai mai ai le siama mo le 21 aso. Ma ua api nei i le nofoaga ua saunia i Motootua. I le taimi atoa o le a faatino ai le latou galuega. O lona uiga e faatoa toe talii i o latou aiga pe a maea lenei galuega.

Lau Afioga i le Fofoga Fetalai, ona o le tulaga i le puipuia pea o le atunuu mai lenei faamai, aemaise ai le aliai mai o lenei tulaga i nisi o le pasese na taunuu mai ananafi. Ua manatu ai le Kapeneta, ina ia tolo le malaga na fuafua mai i Niu Sila i le Aso Toonai nei e mo se vaiaso ona toe iloilo ai lea.

O lenei tulaga ua le alofia ina ia maua ai le avanoa lelei e o tatou fomai e saga matimati ai le mataituina o le pasese na taunuu mai ananafi. Aemaise le vaavaaia totoa o i lato ua aafia nei. E ono i ai foi se fuafuaga ina ia faapafale le toe malaga mai o tagata mai Ausetalia mo lenei taimi. Se i mataitu le tulaga o le pepesi ai o le vairasi o le omikoron i lea taunuu.

I le faafofoga mai o si o tatou atunuu, o le tatalo ia aua ne i faapopoleina. O lo o galulue pea lo tatou Malo ma le aufaigaluega e faatino le galuega ua atoa nei le 2 tausaga o faaauau pea, aua le puipuiga o si o tatou atunuu. Ou te tatalo atu i le Palemene ina ia taimua i tatou i le uunaia o puipuiga faale-Soifua Maloloina lautele. E pei o le faia o tatou talifofoga, face masks, fufulu mama ou aao ma tausisia pea le tuvava.

E faapena foi se tuualalo i si o tatou atunuu, ina ia alofagia e faatino pea gaoioiga uma mo le tausisia o le tumama lautele, aemaise aiaiga mo le puipuiga faale-Soifua Maloloina lautele.

Ia tatou tatalo pea i le Atua, ia i ai pea Lana puipuiga mo Samoa ma ona tagata a o tatou i ai i nei vaitau maaleale.

Lau Afioga i le Fofoga Fetalai, o le faaaliga lea mo le silafia e le Palemene aemaise si o tatou atunuu o tapuai mai.

A taape lenei mamalu, momoli atu lau Afioga ma Maota i aiga mo malologa o le afiafi i le agalelei o le Atua. Soifua. Faafetai.

**FOFOGA FETALAI:** Ua faafofoga le Maota i saunoaga a o le faasilasilaga a le Tamaitai Palemia. E momoli atu ai le faafetai ma le faamalo i lau Afioga i le Taitai o le Malo. E molimauina lava ma le agaga faafetai le faatautaiga o le sa o le atunuu. O lo o taumafai pea e faailoa ma taulogologo mo le silafia e le Maota ma tulaga o le Malo i taimi e tali atu ai i manaomiaga

mo le lelei ma le saogalemu o le atunuu. Malo faafetai mo le saunoaga manino i lenei afiafi.

Ua talafeagai tonu ma le tatou taunuu i le tatou taimi manava. E ao ai lava ona momoli atu ai le faafetai a le Fofoga Fetalai i le paia o le Maota, ua sologa lelei a tatou Taulumaga i lenei aso, ona o le lavapapale ma le onosai o a outou afioga i sui usufono mamalu.

E faafetai atu i lau Afioaga i le Palemia ma le Kapeneta, molimauina lava o le saausi o la outou tapuaiga i saunoaga a sui usufono mamalu, a o faaleo le tuualalo ma momoli atu foi manaoga o latou itumalo. E faapena lava faiga masani o le tatou galuega, ae ua faamalo le onosai mo le faaauauina o tatou Taulumaga.

E momoli foi le faamalo ma le faafetai i sui mamalu sa sausaunoa i lenei aso, ua faamalo tapena, faamalo tofa, faamalo le uta.

Ou te faamalulu atu foi, alofa ma faamagalo le Nofoa pe a fai ua i ai se upu a o se aga ua le tautamalii. Ua na o le Atua e i ai le atoatoa, ae faamoemoe i lo outou finagalo faale-Atua. O le naunautaiga ia te au, ia tausisia lava tulaga mamalu ma le aloaia o le Fono Aoaofaitulafono.

Faafetai Samoa i lau tapuaiga, i ou paia faale-Tala Lelei, paia faale-Malo ma mamalu faaleaganuu, nuunuu atu ia, o le a le toe autalaina i se gagana. O upu e masani ai, e le sili le tai i lo le tapuai. E faapena se lagona, e manuia faiva o lau Palemene i lenei aso ona o lau tapuaiga. Ofisa Sili o Pulega o Matagaluega, o Faalapotopotoga Tumaoti a le Malo, malo faafetai le onosai. E tele lava faiva ma tiute o lo outou valaauina, ae o lo o molimauina pea la outou taputapu, a o alofaiva le Palemene. Ua faamalo le lagolago mo le taumafaiga o le tatou galuega. E le faagaloina foi le auaunaga faifaipea a le Matagaluega o Leoleo ma le Pulega o Tinei Mu, mo le puipuiga o le saogalemu o le Palemene malo faafetai. O le a se mea ua mafai ona tatou fai, ia faia lava mo le faasilisiliina o le viiga o lo tatou Atua. Alofagia e le Atua lo outou afifio atu i lenei afiafi.

Ae tatou te le i tolopo, ou te talosagaina le Afioaga i le sui usufono mamalu mo Lefaga ma Faleaseela e saunoa se tatalo e faaiu ai le tatou Fono i lenei aso. Ma le agaga faaloalo.

*Na tolopo Taulumaga a le Fono Aoaofaitulafono i le itula e 6:05 i le afiafi, seia aulia le itula e 9:30 i le taeao o le Aso Faraile, 21 Ianuari 2022.*